

四庫全書

子部

欽定四庫全書

子部

萬姓統譜卷

七十一

詳校官中書_臣徐志晉

主事_臣祁韻士覆勘

總校官知縣_臣楊懋珩

校對官中書_臣李 榮

謄錄監生_臣陳元熙

欽定四庫全書

萬姓統譜卷七十

明 凌迪知 撰

四紙

李

隴西徵音顓頊曾孫堯時咎繇為理官子孫以官為氏殷末裔孫理利貞逃難伊侯之墟食木子變姓李十一代孫老君一居趙郡一居隴西生廣廣之後生淵

周 李耳

楚苦縣人母懷之八十一歲乃生生即白首因號老子又曰老聃仕周為守藏吏又為柱下史

博古通今孔子往問禮焉老子曰良賈深藏若虛君子盛德容貌若愚孔子退曰老子其猶龍乎

後見周衰乃西出函關隱去關尹喜求長生術為著道德五千言其言曰天地所以能長且

久者以其不自生又曰我無為而民自化
後治天下者多用其術學仙之士皆宗焉

李牧

趙人為趙將常居代雁門遇匈奴不戰者數歲
後一戰大破匈奴十餘萬騎又大破秦軍以功

封武

安君

李同

趙邯鄲人秦圍邯鄲急平原君患之同曰今君
誠能令夫人以下編于士卒家之所有盡以饗

士平原君從之得敢死士三千同遂與俱赴秦
軍秦軍為之却三十里亦會楚魏救至秦兵遂

罷同戰死封

其父為侯

李冰

仕秦為蜀守鑿離堆以灌漑諸郡沃野
千里而無水患號為陸海蜀人德之

李離

晉文公之理也過聽殺人自拘當死文公曰下
吏有過非子之罪也李離曰臣居官為長閔

為多今過聽殺人傳其罪於吏非所聞也竟伏劍而死

李斯

楚上蔡人從荀卿學帝王術西說秦王以為丞相下禁書之令變蒼頡籀文為玉箸篆

李談

邯鄲傳舍吏子諷平原君却秦

漢李左車

行唐人初仕趙封廣武君趙王歇不用左車計竟為韓信所敗信募得左車師事之用其

計策下燕齊諸城

李宮

按史記老子之子宗宗子注注子宮宮之玄孫假仕漢文帝

李廣

隴西成紀人其先李信秦時為將廣世受射文帝時擊匈奴以功為散騎常侍數從獵格殺猛

獸文帝曰惜廣不逢時當高祖世萬戶侯何足道哉歷上谷隴西北地雁門雲中太守武帝時

為北平太守匈奴畏之號飛將軍結髮與匈奴大小七十餘戰以石為虎射之沒矢從弟蔡及三子曰當戶曰椒曰敢皆為郎孫陵亦為將

李朔

以校尉三從大將軍衛青擊單于封涉軹侯

李敢

廣第三子以校尉從征奪左賢王旗鼓斬首多爵關內侯怨大將軍青殺其父擊傷青青匿諱之後敢從上獵甘泉霍去病怨敢傷青射殺之

李廣利

為貳師將軍伐勝大宛封海西侯

李當戶

前將軍廣之子漢景帝時為郎天子與韓嫣戲嫣少不遜當戶擊嫣嫣走于是天子以為

勇

李少君

字雲翼入泰山採藥病困遇安期生以神樓散一匕與服而愈上言於漢武曰臣能凝雪

傾成白銀化丹砂成黃金控飛龍而八遐徧乘白鶴而九垓同冥海之棗如瓜鍾山之李如瓶

臣皆得而食之遂生奇光上尊禮之

李陵

字少卿廣孫當戶子少為侍中建章監天漢二年貳師擊左賢王陵請曰臣所將皆荆楚勇士

奇才劒客力扼虎射命中願得自當一隊持步卒五千深輜戎馬之地矢盡而降司馬遷以為

有國士之風雖古名將不過也

李翕

武都太守開陝西及大井道有政績

李充

字大遊陳留人家貧兄弟同居易衣而出竟日而食妻挾其私欲分異充黜之延平中為博士

遷左中郎將年八十餘平帝時
為國三老時被進見賜以几杖

李根

許昌人有趙買者聞其父祖言已見根比買事
根年已八十四而根年少自若有得根素書讀
之其自記云以漢元封學道
於某甲計之已七百餘歲矣

李業

廣漢梓潼人有志操以明經除議郎王莽篡位
遂去官公孫述徵之不起使人遺以毒藥業曰
危國不入亂國不
居遂飲毒而死

李延年

中山人女弟得幸號李夫人延
年善歌為變新聲為協律都尉

李咸

孤特自立自大鴻臚拜太尉自在相位約身率
下常食脫粟飯醬菜而已刺史二千石牋記非
公事不發省以乞骸骨見許
還所賜物乘弊牛車而去

李忠

字仲都黃人仕為郎以好禮脩整稱更始時與任光同奉光武累以戰功封中水侯平龐萌遷

丹陽太守

圖形雲臺

李通

宛平人父守好星厯識記通知漢當復興乃遣弟軼迎光武相結定議舉兵光武即位徵為衛尉封固始侯進拜大司空卒諡恭毅通

性謙恭常欲避權勢能以功名終云

李善

字次孫涑陽人本同縣李元蒼頭元家俱病死惟孤兒續始生數旬而貲財十萬諸奴欲謀殺

續分其財善潛負續逃亡及長為理舊業告奴婢於官悉殺之光武聞其行詔拜善及續並為

太子舍人善後遷日

南太守續至河間相

李育

字元春涑人少習公羊春秋為班固所重章帝時為議郎後拜博士詔與諸儒講論白虎觀為

時通儒累

遷至侍中

李恂

字叔英安定臨涇人少習韓詩教授諸生仕為侍御史持節使幽州能宣布恩澤章帝嘉之拜兖州刺史清約率下後歸鄉里潛居山澤間詣洛陽時歲荒公卿餽糧悉不受

李法

字伯度南鄭人博通羣書性剛而有節和帝時舉賢良除博士遷光祿大夫上疏言宦官權重椒房寵盛忤旨免官後徵拜諫議大夫正言極詞不改於舊終汝南太守

李郃

南鄭人通五經善天文和帝遣二使者觀風俗向益州宿候舍郃時為候吏因問曰君來時寧知二使何時發二人驚問郃指曰有二使星向益部故知之耳

李尤

字伯仁廣漢雒人少以文章顯和帝時侍中賈逵薦召拜蘭臺令史安帝時為諫議大夫撰漢

紀順帝立遷樂安相卒年八十三所著詩賦銘誄頌七歎哀典凡二十八篇

李南

字孝山少篤學明於風角漢和帝永元中太守馬稜生盜賊事被徵當詣廷尉吏民不寧南特

通謁賀稜意有恨謂曰太守不德今當即死而君反相賀耶南曰旦有善風明日申時應有吉

問故來稱慶旦日稜延望景晏以為無徵至晡乃有驛使齎詔書原停稜事南問其遲留之狀使者曰向渡宛陵浦里旒馬踠足是以不得速稜乃服焉後舉有道辟公府病不行終于家

李固

字子堅郃州狀貌有奇表好學負笈從師究覽墳籍陽嘉中公卿舉固對策鯁切順帝拜議郎

冲帝拜太尉後為梁

冀所害天下痛惜之

李雲

字行祖甘陵人舉孝廉桓帝朝為白馬令時中常侍單超等以誅梁冀功封侯用事雲上書指

其奸邪害國遂下獄杜眾陳蕃上
疏救雲不聽竟死獄中天下寃之

李燮

字德公本漢中南鄭人太尉固小子梁冀害固
竝收其二子固女文姬適同郡趙伯英知父將
及難以燮托父門生王成曰李氏存亡在此矣
成以燮入徐州界燮姓名為酒家傭成賣卜於
市陰相往來燮從受學酒家異之妻以女燮遂
得專精經學十餘年還鄉里追服姊弟相見悲
感旁人徵拜議郎遷河
南尹時人稱其世忠

李膺

字元禮潁川襄城人舉孝廉累官青州刺史守
令間風解印綬去後為司隸校尉有被其容接
者名為登龍
門黨錮免官

李曇

潁川人少孤事繼母至孝陳蕃等薦之曰曇德
行純備擢登三事必能贊宣盛美增光日月桓

帝以安車元纁徵之不起

李祥

淮陽太守時經喪亂民多流徙祥撫循有方歸者萬餘家

三李典

字曼成鉅野人仕魏屢立戰功封都亭侯典好問學貴儒雅不與諸將爭功敬賢士大夫恂恂若不及軍中稱其長者卒謚愍侯

李嚴

南陽人少為郡職吏以才幹稱劉璋用為成都令後歸昭烈拜偏將軍進尚書令昭烈疾革嚴

與諸葛亮並受遺詔輔幼主為中都護統內外軍事留鎮永安封都鄉亭侯

李通

江夏人與陳恭共起兵朗陵建安初歸魏拜中郎將破張繡軍封建功侯袁紹嘗誘以官爵通斬其使又擊羣盜定淮汝之地拜汝南太守卒謚剛侯

李孚

字子憲鉅鹿人袁尚領冀州以孚為主簿尚與其兄譚爭鬪出軍平原會魏武圍鄴議遣人入

鄴使知外動止孚請自往鄴圍甚堅孚止選三人從得以計入尋復以計出尚被破走遂詣譚

為主簿譚死任魏稍遷至司隸校尉年七十餘精識無衰而術略無損於故終陽平太守

李朝

鄆人蜀漢益州別駕與其弟邈以文稱於時邈仕為犍為太守嘗面折昭烈以忠鯁稱

李譔

涪城人從梓潼尹默講學五經諸子無不該覽蜀漢後主以為太子庶子譔嘗著古文易尚書

毛詩三禮
左傳指歸

李乾

山陽鉅野人有雄氣合賓客數千家在乘氏初平中以東隨魏武破黃巾於壽張又從擊袁術征徐州呂布之亂魏武遣乾還乘氏慰勞諸縣布別駕薛蘭治中李封招乾欲俱叛乾不聽遂

殺

李餘

涪城人蜀漢時年十三父殺人出亡母下吏餘乞代母死吏不許遂自殺郡以狀聞詔圖像府

庭

李恢

字德昂建寧人都督鄧方卒先主問恢誰可代者恢曰先零之後趙充國曰莫踰老臣臣不自量惟陛下察之先主曰孤之本志已在卿矣遂以恢為都督交州刺史後隨亮平定南土軍功

居多加安

漢將軍

李衡

武陵人吳建興間為丹陽太守加安遠將軍每欲理產業妻習氏不許衡密遣人於龍陽種橘千株臨終謂其子曰汝母惡吾營家故家貧如此吾於汜州種橘乃千頭木奴不費汝衣食太

史言江陵千樹橘
其人與千戶侯等

晉
李義

鄆縣人時盜起荆湖義傾家貲市兵器率鄉人擊破之闔境以安荆州牧陶侃召至麾下分兵使賊戰屢有功事平旌賞獨優鄉民立祠於故居號其地曰太尉原

李盾

字宣伯遼東襄平人祖敏漢河內太守去官還鄉里公孫度欲強起之敏乘舟浮海莫知所終盾父信追求積年情若居喪而不聘娶或勸之曰不孝莫大於無後迺娶妻既生盾遂絕房室數年而卒盾幼孤及有識追念其父以孝聞智度沉寔言必有則仕封廣陸侯進尚書僕射遷太子少傅家至貧約兒病無以市藥武帝聞之賜錢十萬拜司徒

李喜

字季和銅鞮人少有高行累辭徵辟初仕晉拜御史中丞當官正色百寮震肅後仕魏為太子

太傅遷尚書僕射卒贈太保

李穀

朝孫性豁達賑恤窮民篤於故舊仕為寧州刺史從弟泌仕為隸為太守以清儉稱

李密

字令伯隸為武陽人父早亡母更適人鞠於祖母劉武帝徵為太子洗馬詔書屢下密上表曰

臣無祖母無以至今日祖母無臣無以終餘年臣今年四十有四祖母劉今年九十有六是臣盡節于陛下之日長報劉之日短也帝覽表曰密不空有此名

李重

字茂曾江夏人少好學弱冠與始平王為友上疏論九品官人法重居吏部以清謹見稱永康初相國左司馬卒家貧宅隘無殯斂謚曰成子

李矩

平陽人勇毅多權略永嘉初領河東平陽太守時饑疫矩悉心撫恤百姓賴焉後以功累封平

陽侯

李驤

涪城人與成都杜軫俱為尚書郎與軫齊名每有論議朝廷莫能踰之時號蜀有二郎

李特

宕渠人其祖將五百家歸魏遷于略陽元康中關西擾亂特隨流入入蜀太安初自稱益州牧子雄遂稱帝雄寬厚簡刑約法時海內大亂而蜀獨無事百姓富實傳至孫勢為晉桓溫所平海鹽人隆安中從內史袁崧築滬瀆壘禦孫恩崧為賊所害洋突白刃收崧歸葬時皆義之名

李祥

其所居輿城曰孝義里

李含

字世容三郡並舉孝廉

李充

字宏度善楷書妙參鍾索著學箴征北將軍褚裒引為參軍以家貧求外出知剡縣令于顯有

文義郡舉孝廉兄式以平允著稱善楷隸仕至侍中

李茂

字仲魯為襄陽太守崇教化修學校表篤行拔賢能清簡無正身率下二年彈黜四縣

南李叔彪

修人好學博古有識度魏泰和中三遷至國子博士以公平見重於時歷遷中書侍郎尋

除假節行華州事為吏民所稱

李鉉

南皮人家素貧常春夏務農秋冬乃入學從浮陽李固仁受毛詩尚書章武劉子猛受禮記又與州里楊元懿河間宗惠振等結友諸大儒徐遵明授業嘗撰定孝經論語毛詩及三傳異同周易義例合三千餘卷北齊時累遷至國子博士

李靈

平棘人父勰有聲趙魏間魏道武時靈以才雋被徵拜中書博士尋遷授文成帝經終洛州刺

史贈鉅鹿郡公子恢襲爵為侯
恢孫謹好學不倦終大司農

李曾

孝伯之父魏道武時為趙郡太守令行禁止并
州丁零數為山東害知曾能得百姓死力憚不

入境賊於常山界得一死鹿賊長謂趙郡地也
責之還令送鹿故處郡謠曰詐作趙郡鹿猶勝
常山粟其
見憚如此

李孝伯

順從父兄弟兄祥歷河間淮陽太守孝伯博綜
羣書動止有度太武初累遷散騎侍郎明達

政務朝野
推重之

李順

靈從父弟多計策仕魏以中書侍郎從征蠕蠕
有功賜爵平棘子後從克統萬惟取書數十卷

卒追封高平
王謚曰宣

李安民

蘭陵人祖焜衛軍參軍父欽之殿中將軍安民在明帝時為城司參軍擊赭圻湖白荻浦

懶窟皆捷除積射將軍又擊鱗口鵲尾江城皆有功後討薛安都於彭城軍敗安民在後拒戰還保下邳屢以軍功進封康樂侯卒謚肅侯

李翥

字彥鴻世居柏人弱冠以文章知名仕北齊位東平太守以文章飾吏事後待詔文林館除通直散騎常侍聘於梁貧無居宅寄止佛寺中常著巾帔終日對酒招致賓客風調詳雅翥從父兄子朗翥之流亞兼有吏能位中書舍人

李庶

頓邱人祖平魏尚書僕射父諧大司農各有傳庶方雅好學甚有家風歷位尚書郎司徒掾以清辯知名常攝賓司接對梁客徐陵深歎美焉

李邕

字穆修，頓邱人。幼而俊爽，有逸才，著作佐郎。高陽王雍友，凡所交遊，皆倍年俊秀，才藻之美為

時所

稱

李諧

字虔和，頓邱人。風流閒潤，博學有文辯。當時才俊咸相欽賞，受父前爵彭城侯。

李先

字容化，中山盧奴人。少好學，善占相。仕魏為博士，太武問何者可以益人神智，對曰：「唯有經書。」

又曰：「朕欲集天下書籍，如何？」對曰：「王者欲集不難，於是下詔搜訪遺書。」

李惠

中山人。太武時累官雍州刺史，為人明敏，長於思察。人吏莫敢欺犯。後遷青州刺史，歷政有美

績，為文明太后所忌，陷天下冤惜之。

李璨

靈弟。受學梁祚，仕魏為中書郎，以定淮北功賜爵。始豐侯子，二元茂位司徒，彭城鎮副將人吏

安之宣茂位為定州大中正曾

孫繫有文學嘗著達生丈人籍

李沂

魏相州刺史政尚清簡百姓愛之嘗請州郡立學詔從之政為諸州最

李謐

孝伯從孫十歲喪父哀號動人事兄瑒極恭謹十三通詩書而歷數之術尤精鄉人以神童號

之著明堂制度魏文成徵拜著作郎不就賜號真靜處士弟郁博通經史仕魏累遷為黃門侍郎

李繪

靈曾孫六歲就學既長神情朗雋其舅邢晏每歎曰宅相之寄良在此甥仕魏歷中書侍郎每

朝君臣對揚繪先發言端音詞辯正風儀都雅聽者悚然弟緯有才學位中散大夫

李元忠

靈曾孫有志操覽書史及陰陽術數居喪以孝聞仕東魏累官侍中每進從橫之策高歡

嘉納之卒贈司徒謚忠惠子撓有才藝嘗采諸聲別造一器號曰八弦武定末除河內太守居數載流人盡復代去父老泣送生為立祠

李燮

西魏京兆尹吏民愛敬歌之曰恩如春威如虎愛如母訓如父

李渾

渾兄仕魏為青州征東司馬時崔杜客反海岳渾與諸將畫策擒杜客入北齊累官太子少保時邢邵為少師楊愔為少傅論者榮之子湛涉獵文史官至通直散騎常侍

李公緒

靈之後博通經傳尤善天文圖緯魏末為冀州司馬屬疾去任隱贊皇山北齊以御史徵

不就沉冥樂道所著有興言禮質疑喪服章句古今略記玄子趙語若干卷子少通有學行繫終齊功曹參軍撰戰國春秋音譜

李喬

伯父季林魏中大中大夫嘗守博陵郡以威嚴名喬仕北齊為神武大丞相諮議參軍累功封

固安伯卒贈

尚書令司徒

李幼廉

高邑人幼時人故以金寶授之終不取州牧以其幼而廉故名焉仕北齊歷數州守所在

見稱後和士開權重百寮盡傾幼廉高揖

而已出為南青州刺史卒贈吏部尚書

李士謙

平棘人幼孤事母孝其伯父瑒稱曰吾家曾子也博覽羣籍善天文術數北齊時徵辟不

就家故富每凶年散粟賑貧合藥救疾羣犬生

子交相乳之人謂仁心所感比卒北郡士女聞

而流泣相與

樹碑于墓

李崇

字季長頓邱人性寬厚深沉有謀仕魏孝文為荊州刺史氏人作亂命崇都督隴右諸軍事討

平之遷至徐州大都督卒謚武康崇善御衆寇賊侵邊所向輒摧破號曰卧彪

李平

字曇定崇從弟涉獵羣書有文才仕魏為散騎常侍自請效一郡拜長樂太守政務清簡吏民懷之徵拜河南

尹後遷司徒

李業興

長子人博涉百家圖緯風角天文占候無不討練舉孝廉為校書郎以造曆之勲封屯留

縣子業術精微當時莫及于崇祖傳其業

李獎

字遵穆平之長子容貌魁偉有當世才位中書侍郎兼尚書出為相州刺史前後所歷皆以明

濟稱後為趙紹所殺宋游道上書訟冤贈將軍冀州刺史

李安人

蘭陵人宋時悉衆南歸明帝大驚曰卿面方如田封侯相也南齊時位至尚書左僕射出

為吳興太

守有清名

李彪

字道固頓邱衛國人魏孝文賜名初為中書教
學博士累遷御史中尉領著作嘗表上言事十

條詔褒美之子鴻道能

屬文歷官所在著績

李構

字祖基獎于少以方正見稱襲爵累遷譙州刺
史構早有名譽歷官清顯常以雅道自居甚為

名流所重云子丕有父

風位尚書祠部郎中

李脩

館陶人父亮精醫術大為廳事以舍病人死者
則就棺殯親往弔視累遷府參軍脩遵父業仕

魏常在禁內鍼藥有效

賞賜累加卒于太學令

李志

字鴻道彪長子博學有才幹年十餘歲便能屬
文彪甚奇之謂崔鴻曰子宜與鴻道為二鴻於

洛陽歷荊州刺史征虜將軍
弟游有才行為當時所稱

李元護 眉八世孫少有武力頗覽文史仕魏為齊州
刺史遇饑荒表請賑貸蠲其賦後卒贈青州

史刺

李遷哲

字孝彥安康人世為山南豪族遷哲慷慨善
謀畫其父仕江左為衡州留遷哲本鄉監都
部曲撫馭羣下甚得其情周文略地山南遷哲
軍敗乃降以其信著山南令與賀若敦同往經
略遂平寇亂巴濮之人降
款相繼授侍中直州刺史

李叔仁

隴西人驍健有武力仕魏前後數從征討有
功梁王超宗侵魏叔仁為統軍隸揚州刺史

薛真度討破之累遷洛州刺
史封陳郡公官終大都督

李遠

成紀人兄賢少志於學仕魏為原州刺史恭帝初賜爵河內郡公卒謚曰恒遠仕西魏累官大

將軍尚書左僕射周

閔帝踐祚進位柱國

李穆

成紀人賢弟穆以二兄賢遠並為佐命功臣而子弟布列清顯深懼盈滿辭不拜不許數年進

位上柱國

并州總管

李弼

隴西成紀人初仕魏封石門縣伯後歸周與齊神武戰河東以功進封趙國公弼每征討朝受

命夕上路性沉雅有深識故能以功名終曾孫

密志氣雄遠少襲父蒲山公爵隋末兵亂自稱

魏

公

李禮成

魏狄道人祖延實為司徒父或為侍中禮成以戰功累官至絳郡公襄州都督有惠政於

民

卷九十

李珪

字弘璋江夏人南齊時為尚書左丞時中外穀帛至賤珪議出上庫錢五十萬及諸州錢皆令

雜買從之

後兼少府

李訢

字元盛太武曰李訢後必官達蓋人門戶又曰觀此人舉動豈不異於眾也必為朕家幹事臣

為相州刺史獻文以其政為諸州最加賜衣服後見廢張謹與語奇之曰此佳士也終不久屈未幾為太

倉尚書

李義深

有當世才用而心冒險峭語曰劍戟森森李義深仕齊遷齊州刺史

李孝貞

字元操射策甲科拜給事中兄弟並以文學自達後除黃門侍郎以美於詞令勅掌宣傳

詔勅

北史

李仲舉

名超以字行於世性方雅善制白晳美鬚眉高簡宏達風調疎遠博涉經史不守章句業

至於吉凶禮制親表咸取則焉齊後主時為司州修武令

李冲

仕魏孝文為秘書令後進爵隴西公冲家素清貧於是室富而嫌於自牧積而能散近自姻族

逮於鄉閭莫不分及虛已接物垂念霸寒哀舊淪屈由之躋叙者亦以多矣時以此稱之

李義

北齊人爾朱榮之死也東徐州刺史斛斯椿是其黨內懷憂懼時梁立汝南王悅為魏主資其

士馬送之境上椿遂降悅與蘭陵太守李義擊其偏師破之

李韶

以年及懸車抗表遜位優旨不許轉定州刺史常侍如故及赴中山冀州父老皆送出西境相

聚而泣二州境既連接百姓素聞其德州內大安魏孝明帝正光五年卒於官年七十二詔賜帛七百匹贈司空謚曰文恭既喪之後有冀州兵千餘人戍於荊州還經韶墓相率培冢數日方還其遺

受如此

李安世

魏文成帝時出為相州刺史假趙郡公教農桑斷淫祀初廣平人李波宗族強盛殘掠不

已前刺史薛道衡親往討之大為波敗遂為逋逃之藪公私咸患百姓語曰李波小妹字雍容褰裙逐馬如卷蓬左射右射必疊雙婦女尚如此男子那可逢安世設方略誘波及諸子姪三十餘人斬於鄴

市州內肅然

李鄴

洛陽人曾祖坦馮翊令祖仲芳大理司直父元福建觀察推官鄴仕梁歷滑魏宋三鎮留後遷

禮部尚書至唐以太子少傅致

仕卒贈太保子延昭殿中丞

李瑒

字琚羅孝伯子魏孝明時大師高陽王雍表薦瑒為友以時人多絕戶為沙門瑒上言三千之

罪莫大於不孝不孝之大無過於絕祀安得輕縱背理之情而肆其向法之意缺當世之禮而求將來之益棄堂堂之政而從鬼教乎沙門都統僧暹等忿瑒鬼教之言以瑒為謗毀佛法泣訴靈太后責之瑒自理曰鬼神之名皆是通靈達稱佛非天非地本出於人名之為鬼愚謂非謗靈太后難以瑒言為允然不免暹等意猶罰瑒金一兩

李集

為齊興御丞面諫比帝有甚於桀紂帝令縛置流中沈沒久之復令引出謂曰吾何如桀紂集曰向來彌不及矣帝又令沈之引出更問如此數四集答如初帝大笑曰天下有如此癡漢方

知龍逢比干非是俊物遂解放之又被引入見
似有所諫帝令將出要斬其或斬或赦莫能測
焉

隋
李德林

字公輔安平人幼聰敏年十五誦五經及古
今文集日數千言遂博該墳典仕隋為內史

令文帝受禪時製作皆出
其手後與高類同修律令

李雄

高邑人祖楹魏大中大夫父徽北齊陝州刺史
雄慷慨有大志隋初累功進爵高都郡公後從

晉王出鎮并州雄當
官正直王甚敬憚焉

李直之

凱州刺史除喪去曾興學設教化行俗美有
遺愛於民童謠歌曰李侯切莫去此地可無

憂

李諤

趙郡人博學性方明於時務初仕北齊入隋累官侍御史時禮教彫弊文體輕薄諤具疏矯正

文帝嘉納且以所奏頒示天下予三大方有才氣判內史舍人大體大鈞竝位尚書郎

李德饒

粲四世孫曾祖籍之後魏大中大夫嘗著忠詰祖徹北齊尚書左丞父純隋介州長史德

饒好學有至性由校書郎轉監察御史每巡四方理冤枉褒孝悌凡師交皆海內名流

李知本

元氏人涉獵經史事親篤至兄弟雍順子孫百數庭無間言大業末盜賊過閭不入且相

戒曰無犯義門往依者五百餘室

李衍

遼東襄平人父弼周太師衍少專武藝慷慨有志略仕隋以行軍總管討叛蠻平之進位柱國

從秦王俊伐陳有功拜安州總管頗有惠政

李文博

性貞介鯁直好學不倦至於教義名理時所留心每讀書至安危得失忠臣烈士未嘗不

反覆吟翫開皇中為羽騎尉特為吏部侍郎薛道衡所知恒令在聽事帷中披檢書史并察已行事若遇政事善事即抄撰記錄如選用疎謬即委之臧否道衡每得其語莫不忻然從之時朝政浸壞人多臧賄唯文博不改其操論者以此貴之遭亂播遷不知所終有所著政道集行世於

李謙

字子約平棘人年二十魏廣平王贊辟開府參軍丁母憂服闋不仕趙郡王獻舉德行不就

和士開亦重其名將請朝廷擢為國子祭酒謙知固辭得免隋有天下畢志不仕開皇八年終於

家

李允

成紀人慷慨有英略開皇中擊突厥有功拜上柱國武陽郡公朔州總管為突厥所憚或譖其

謀反上譴怒

之憂憤而卒

李景

天水人容貌奇偉驍勇善射開皇中以行軍總管從王世積伐陳有功進位開府

李安

狄道人父蔚事後周為朔燕恒三州刺史安與弟慈俱仕隋平陳時安率軍夜襲其功最多高祖手詔褒獎官至寧州刺史柱國趙郡公子孝恭最有名慈官至衛州刺史順陽郡公

萬姓統譜卷七十

欽定四庫全書

萬姓統譜卷七十一

明 凌迪知 撰

唐 李襲志

字重光安康人仕隋始安郡丞大業末盜賊起襲志傾家產募士得三千人來城拒盜蕭

銑林士宏屢攻不下聞煬帝喪乃與士民縞素

三日臨或說之曰公臨郡久士大夫悅向蠻夷

畏威雖曰隋臣實君長也今四海分裂白王者

非一姓宜遂德順表取百粵豈遽不若尉佗乎

襲志曰吾世隋臣今江都雖淪宗社尚有奉諸

君當相與戮力刷讐恥豈怙亂圖不義哉吾寧

蹈忠死不逆節以生尉佗不足為吾法也固守

凡二年力窮援絕為賊所陷偽署兵部尚書桂

州總管武德初高祖賜書命其子元嗣召之襲

志約嶺南酋永平郡守李光虔潛圖歸國帝復

以書諭曰公朕之宗不可與異姓比宜及子弟並豫宗正屬籍及銑平嶺南六十餘州皆送款襲志誘而致云趙郡王孝恭承制授桂州總管五年來朝進柱國封始安郡公江州都督復討輔公柘為水軍總管轉桂州都督襲志守桂二十八年政尚清省南方便之

李綱

觀州薊人少慷慨尚風節事隋為太子洗馬唐初拜禮部尚書兼太子詹事甚有匡益後太子寢狎無賴綱頻諫不見聽遂乞骸骨高祖曰知公直士幸卒輔吾兒乃拜太子少保貞觀中復為少師發言陳事毅然不可奪卒謚曰貞

李全忠

范陽人仕為狄州司馬有蘆生其室一尺三節怪之以問別駕張建建曰蘆茅類生於宅茅土兆也傳節者其三世乎後果為眾推為留後拜節度使卒子匡威嗣之未幾次子匡籌奪

之尋
敗

李道宗

字承範高祖即位授左千牛備身略陽郡公三年為大同道行軍總管助李靖破虜親執

頡利可汗賜封六百戶還為刑部尚書吐谷渾寇邊靖出崑邱道詔與侯君集為靖副陰引千

騎超山乘其後賊驚遂大潰徙封江夏授鄂州刺史

李思行

趙州人避仇太原高祖起兵累具機策以贊大議授左三統軍從破霍邑平京師累功遷

嘉州刺史樂安郡公謚曰襄

李素立

高邑人武德初擢監察御史民有犯法不至死者高祖欲殺之素立諫曰三尺法天下所

共一有動搖則人無所措手足帝嘉納之累官侍御史後封高邑侯卒謚曰平孫至遠治左氏

春秋復撰周書歷天官侍郎
從遠清密篤學官太府卿

李百藥

字重觀德林子七歲能文號奇童後文行為
天下推重時議裂土與子弟功臣百藥上封

建論密止之累官至宗正卿好

獎薦後進祿賜多分於親族

李守素

趙州人通氏姓學世號肉譜虞世南與論江
右山東人物歎曰肉譜真可畏也時渭州刺

史李淹亦明譜學守
素所論惟淹能抗之

李勣

字懋功曹州人本姓徐初從翟讓為盜李密亡
命雍邱勣說讓推密為主武德二年密歸唐其

地勣統之乃錄郡縣戶口使密自上之高祖以
為純臣詔授黎州總管封英國公賜姓李從泰

王伐東郡畧地至虎牢降沈悅平竇建德又破
劉黑闥平輔公祐太宗即位拜并州都督破降

突厥頡利又從征高麗高宗立進尚書左僕射
時欲立武昭儀為后高宗密訪勣勣曰此陛下
家事何須問外人帝意遂
定而王皇后廢卒謚貞武

李义

字尚真趙州房子人沉正方雅為監察御史時
遣使江南發庫貲以贖生义上疏諫曰與其拯
物莫若優民後進吏部侍郎請謂不行時人語
曰李下無蹊徑兄尚一尚正俱以文章名所著

詩文號

華萼集

李感

勣季弟年十五有奇操李密敗陷於王世充世
充令感作書召勣感對曰兄尚節義今已事主
昆弟不能移也
固不從殺之

李義

琰魏州昌樂人舉進士補太原尉時李勣為都
督僚吏憚之義琰獨敢辯曲直累官至銀青

光祿大夫致仕從弟義深舉進士累官
刑部侍郎後為黎州都督終岐州刺史

李知本

趙人涉獵經史事親篤至兄弟雍順子孫百
數庭無間言大業末盜賊過廬不入且戒曰

無犯義門往依

者五百餘室

李靖

字藥師三原人姿貌魁奇嘗謂所親曰大丈夫
當以功名取富貴何至作章句儒其舅韓擒虎

與論兵曰可與語孫吳矣貞觀中出將入相封
衛國公卒謚景武圖形凌烟第客師累戰功封

丹陽

郡公

李君羨

洛州人初為王世充驃騎尋歸唐從破竇建
德劉黑闥所向先登摧其鋒突厥至渭橋復

擊破之太宗曰使皆如君羨者虜何足
憂累官左武衛中郎將封武連縣公

李玄通

藍田人歷定州總管為劉黑闥所破黑闥愛其才欲以為將不聽因之故吏有餉飲餽者

玄通曰諸君見哀吾能一醉遂縱飲謂守者曰吾能劍舞可借刀守士與之曲終仰天太息曰

大丈夫不能保所守尚何視息邪乃潰腹死

李大亮

涇陽人有文武才畧初為士門令能捕盜賊貞觀時都督涼州有諷使獻名鷹者大亮密

表言之太宗報曰有臣如此朕復何慮入為工部尚書

李昭德

長安人父乾祐後周司刑大常伯昭德彊幹有父風武后時累官御史中丞以剛直稱

李淳風

岐州雍人幼真秀通羣書明步天歷算貞觀初以將仕郎直太史局制渾儀著法象書七

篇上之累遷太史令太宗得識欲求武姓者殺之淳風曰天之所命不可去也若殺之復生壯

者陛下子孫無遺種矣乃止凡於占候吉凶若節契然意有鬼神相之以勞封昌樂縣男所撰有典章文物志

乙巳占等書

李襲譽

襲志弟通敏有識度高祖召授太府少卿擢江南巡撫使為政嚴肅祿分給宗親以餘貲

寫書及歸惟載書數車嘗謂諸子曰吾性不喜財遂至屢乏然負京有賜田千頃能耕之足以食河內桑千枝事之可以衣江都書力讀可以進求官吾歿後能勤此無資於人矣

李善

江夏人有雅行淹貫今古不能屬辭故人號書籠顯慶中兼沛王侍讀為文選注數析淵洽表

上之居汴鄭間講授諸生四遠至傳其業號文選學

李密

字元邃遼東人以蒲鞵乘牛掛漢書一帙角上行且讀楊素奇之時東都賊翟讓聚黨萬人分

兵與密別為牙帳號蒲山公密持軍嚴雖盛夏號令士若負霜雪密殺翟讓王世充聞之曰密天資明決為龍為蛇固不可測也

李高遷

岐州人高祖初以右衛統軍從下霍邑圍長安力戰遷左武衛大將軍江夏郡公

李世勣

太宗征高麗世勣以遼東道行軍大總管自通定濟遼水攻拔蓋牟城進攻遼東城克之

後累征麗
皆有功

李茂貞

鳳翔節度使僖宗朝昌符之亂克平隴州李茂貞有功焉

李襲吉

洛陽人為河中權鹽判官後為晉王掌書記襲吉博學知唐政事累遷節度副使官至諫

議大
夫

李公逸

與族弟善行居雍邱以才雄為衆所歸始附王世充策其必敗乃獻款高祖因其地置杞

州即拜總管封陽夏郡公以善行為刺史世充遣其弟將徐亮兵攻之公逸請援未報因使善行守身入朝言狀至襄城為賊邏送洛陽世充曰君越鄭臣唐何哉答曰我於天下唯聞有唐賊斬之善行亦死帝惜之封其子襄邑縣公

李元則

字彛直高祖之子封彭王出為澧州刺史折節勵行有德政民祠之

李孝恭

少沉敏有識亮高祖以定京師詔拜南山招慰大使徇巴蜀下三十餘州進擊朱粲破之

俘其衆諸將曰粲徒食人摯賊也請阮之孝恭曰不然今列城皆吾寇若獲之則殺詎有降者悉縱之繇是騰檄所至輒下明年拜信州總管承制得拜假圖江陵進前湘道總管統水陸十

二軍發夷陵破蕭銑二鎮遂降帝悅
遷荊州大總管平江南璽書褒之

李義府

瀛州人與來濟同時以文顯時稱來李劉珀
馬周更薦之太宗召見轉監察御史貌柔恭

心褊忌官至右相永徽後
以罪流富州卒集四十卷

李懷仁

陝西狄道人永徽間以宗室子弟授朝議郎
行癭陶縣令為政以學校為先以耕桑為急

能使士民樂業穿窬逆息雖老殘疾憚咸無所
憾故境內有狸相乳麥秀八岐之瑞有德政碑

李嗣真

字承胄邢州柏人人多藝數舉明經直弘文
閣與學士劉獻臣徐昭皆少有名號三少高

宗時累官太常丞武后嘗問以儲貳事對曰程
嬰杵臼存趙孤古人嘉之后悟中宗乃得安二

謹曰
昭

李懷遠

字廣德邢州栢人人少孤嗜學宗人欲籍以高蔭懷遠辭退曰因人之勢高士恥之乃擢

四科第累官至同平章事爵趙郡公懷遠久貴益素約不治居室常乘款段馬卒謚曰成

李景伯

懷遠子仕為諫議大夫中宗宴侍臣酒酣命為回波詞衆以諂言進景伯獨為箴規語以

諷有建言置都督非是者詔羣臣詳議景伯議願罷都督留御史以時按察秩卑任重以制奸之

李敬玄

亳州譙人該博羣集尤善於禮高宗在東宮以馬周薦為崇賢館侍讀累官中書令封趙

國公儀鳳初拜洮河道大總管與吐蕃戰敗貶揚州長史卒謚文獻撰次禮論及他書數十百篇

李日知

滎陽人及進士第武后時歷司刑丞時法令嚴吏爭為酷日知獨寬平嘗免一囚死少卿

胡元禮曰吾不去曹囚無死法后竟用日知讞議累遷侍中罷為

刑部尚書致仕

李延壽

相州人仕為崇文館學士嘗追述父志作南北史一百八十篇上之又撰太宗正典高宗

觀之皆美直筆賜帛褒之

李傑

相州滏陽人本名務光少以孝弟擢第為河東巡察黜陟使課最諸道先天中自陝州刺史改

河南尹府無淹事人吏愛之後為御史大夫

李至遠

素立孫少秀悟治尚書左氏春秋復撰周書紀傳時人許其有良史才上元間制策高第

歷天官侍郎藻鑑精明吏

不能欺出為璧州刺史

李從遠

至遠弟清密有學神龍初歷中書令太府卿累封趙郡公謚曰懿兄弟皆德望相埒

李巖

從遠子年十歲會中宗祀明堂以近臣子弟執籩豆巖進止中禮授右宗衛正曹參軍歷洛陽

尉累遷兵部郎中發扶風兵應姚後稱旨遷諫議大夫封贊皇縣伯終兵部侍郎善草隸為參

軍時製一策

服之終身

李嶠

字巨山贊皇人十五通五經舉進士累官給事中會來俊臣構狄仁傑獄嶠與大理少卿張德

裕等覆驗卒明其枉神龍初為中書令其為文章張說論之嶠文如良金美玉無施不可一時

學者取

法焉

李迥秀

大亮族孫武后時以鳳閣鸞臺平章事出為衡州長史中宗朝累遷至兵部尚書事母孝

堂產芝草犬乳隣猫中宗謂為孝感旌表其門

李適

萬年人初調猗氏尉與修三教珠英遷戶部員外郎景龍初擢修文閣學士工部侍郎卒子李

卿舉明經博學宏詞代宗時為吏部侍郎李振技幽滯薦進才髦時稱為恢博君子

李元紘

字大綱萬年人父道廣武后時同鳳閣鸞臺平章事元紘初為雍州司戶叅軍時太平公

主勢震天下與民競碾磑元紘還之民長史驚趣改之元紘大署判後曰南山可移判不可移累遷至尚書侍郎再世宰相俱有清節

李讓夷

隴西人性廉介不妄交武宗時拜相位雖顯劇以儉約自持為世咨美

李皋

字子蘭天寶十一年嗣曹王爵由都水使累遷左領軍將軍上元初上書言治道詔授衡州刺

史為觀察使以事貶潮州復為衡州拜湖南觀察使前帥辛京果貪虐使部將王國良戍武岡京果欲圖其家即誣劾以死國良恐據縣反討之再歲不能下皋至遺書國良國良得書喜且畏因請降然內尚首鼠皋單騎稱使者造國良壘賊延使者入皋大呼其軍曰有識曹王者乎乃吾也來受良降國良迎拜叩頭請罪皋執手約為昆弟則盡焚攻守且散其兵有詔赦之後觀察湖南李希烈反討平之遷江西節度使贈尚書右僕射謚曰成

李安期

百藥子也七歲能屬文對高宗曰比見公卿薦進皆劾為朋黨所以人人爭噤嘿以避謗

若陛下忘其親惟才是用誰敢不竭忠以聞數預決國事自德林至安期三世皆掌制詰

李多祚

饒勇善射高宗時以軍功累遷右鷹揚大將軍張柬之將誅二張以多祚素感慨可動以

義乃從容謂曰將軍居北門幾何曰三十年矣將軍擊鍾鼎食貴重當世非大帝恩乎多祚泣數行下曰死且不忘遂定謀以敬暉李湛為右羽林將軍命總禁兵多祚王同皎請太子至元武門斬關入中宗復位封多祚遭陽郡王

李行言

官至給事中中宗貺宴近臣行言歌駕車西河曲大中八年宣宗出獵遇樵夫問其縣令

為誰曰李行言為政何如曰性執有強盜數人軍家索之竟不與盡殺之上歸帖其名於寢殿之柱及除海州刺史入謝上賜之金紫取帖視之

李敬業

勳之孫少從勳征伐歷太僕少卿襲萊國公嗣聖初坐賊貶柳州司馬時武后廢中宗為

廬陵王諸武擅命誅戮唐子孫天下憤之敬業因謀起兵傳檄州縣疏武氏過惡匡復廬陵王

天子位武后遣大將

軍李孝逸擊殺之

李戡

字方舉鄒弟初父死難詔與一子官補修武尉不受以讓其兄戡擢明經書判高等為校書郎

楊翟尉累遷殿中侍御史分司東都昭義判官徐玟故嘗助盧從史為跋扈者從史敗孟元陽

代欲復用之戡移書昭義先擊玟乃上列其

狀帝怒流玟播州轉侍御史庫部員外郎

李華

贊皇人中進士博學宏詞科累官吏部員外郎嘗按劾宰相楊國忠姻姪橫暴由是州郡肅然

所著有含元殿賦弔古戰場文姪翰觀俱以文知名

李棲筠

字貞一贊皇人莊重寡言有遠度為文章有體要舉進士累官御史大夫數奏明辨不附

權勢喜獎人善而樂人攻己
短天下士歸重稱為贊皇公

李吉甫

字弘憲棲筠子為翰林學士擢中書侍郎綜理庶事衆職咸治引薦學士褒獎忠臣之後

時稱賢相以功累封

趙國公卒謚忠懿

李元諒

安息人本安氏冒姓駱後賜姓李驍敢有謀居軍十年時兵興倉卒裹屬為鎧荆蒿為矢

軍氣乃振貞元元年吐蕃請盟詔以軍從渾瑊會平涼元諒以虜情不常請與公連屯瑊不聽

元諒密從營次之俄而虜結盟瑊奔還元諒兵成列出虜騎乃解時以為有古良將風

李桐客

貞觀初累通巴二州刺史治尚清平民稱為慈父

李元愷

邢州人博學善天步歷性恭慎未嘗敢語人宋璟嘗師之既當國厚遺以束帛將薦之朝

拒不答卒

年八十餘

李惠登

營州柳城人為平盧軍裨將安祿山亂從董秦泛海後為隋州刺史興利去害為政清淨

居二十年田野闢戶口增人歌舞之累遷御史大夫卒贈洪州都督

李愷

文水人父希倩神龍初監察御史愷舉明經天寶初守清河有美政民為立祠後尹京兆又為

中都留守安祿山陷東京愷與子十人皆遇害

李自良

兖州泗水人天寶亂往從兖鄆節度使以戰多累授右衛率為人勤且有謀從馬燧討田

悅攻李懷光數摧鋒陷陣功在諸將右貞元中以檢校工部尚書充河東節度使居治九年民不知有軍上下諧附卒贈左僕射

李朝隱

三原人擢明經嘗為長安令宦官閭興貴有所干請曳去之開元中為吏部侍郎先斜封

授官朝隱執罷者千四百員至是銓叙明審累官至御史大夫

李適之

京兆人天寶初代牛仙客為相李林甫以計去之故適之詩有云避賢初罷相樂聖且銜

孟

李嗣業

高陵人長身有膂力以軍功歷官驃騎大將軍天寶末從平安祿山以功封虢國公

李泌

字長源京兆人七歲知為文玄宗嘗與張說觀弈召泌賦方圓動靜泌應聲即對說賀帝得奇

童帝因使與太子為布衣交後謁肅宗於靈武入議國事出陪輿輦兩京之復泌謀多功大官

至宰相封

鄴縣侯

李瑱

永壽人父躍開元末持節磧西著名終左領大將軍瑱畧知書有大志安祿山反瑱守潁川前

後殺賊甚衆以功加防禦招討節度等使封潁國公肅宗末年拜相

李峴

吳王恪孫世居京兆折節下士累官京兆尹玄宗歲幸溫湯畝內皆巧供億以媚上峴獨無獻帝異之乾元初拜相尋出刺史蜀州代宗召為禮部尚書兄峴御史大夫嶧戶部侍郎兄弟同

居門列

三戟

李白

字太白成紀人唐宗室性倜儻善詩歌才思飄逸天寶初召見金鸞殿論當世事詔供奉翰林

玄宗愛其才欲官之會高力士以脫靴為恥譖於貴妃輒為所沮遂浮遊四方寓情詩酒有詩

集三

十卷

李抱玉

本安興貴曾孫世居河西為人沉毅有謀李光弼引為裨校有戰功安祿山亂抱玉上言

世居涼州恥與逆臣共宗詔賜姓李官至司空兼兵部尚書加山南西道副元帥卒贈太保

李頻

字德新壽昌人少秀悟博記覽尤長於詩與詩人方干相善擢進士仕歷都官員外終建州刺

史有詩傳世建人立

廟於梨山歲祀之

李邕

字太和善于早有名重義愛士見特進李嶠願一見秘書嶠假直秘閣未幾辭去嶠驚試問奧

篇隱帙了辯如響因薦之拜左拾遺玄宗初為御史中丞出為北海太守時稱李北海邕文章

書翰皆過人李林

甫疾其名盛害之

李浦

射洪人著補履十卷皆孟軻揚雄之音宰相張延賞表薦拜右拾遺正色抗辭當朝敬憚

李益

長於詩與李賀相埒每一篇成樂工爭求之至征人早行等篇天下皆施之繪圖

李叔明

閬州人擢明經拜洛陽令招徠遺民號能吏遷京兆尹長安歌曰前尹赫赫具瞻允若後

尹熙熙具

瞻允斯

李嘉祐

字從一趙州人天寶七年進士調江陰令肅宗上元中為台州刺史大厯中刺袁州又嘗

為中臺郎故竇常之曰雅登郎位靜鎮方州其詩一卷因號晏閣集

李璡

封汝陽王常於上前醉不能下殿上遣人扶出璡謝罪曰臣三斗壯膽不覺至此杜甫云汝陽

三斗始朝天又贈以詩云

霜蹄千里駿風翻九霄鵬

李寶臣

范陽人善騎射肅宗時歸命封密雲郡公史朝義平擢禮部尚書封趙國公遂有六州地

雄冠山東

卒贈太傅

李幼卿

字長夫大歷間以右庶子守滁州於義興王潭作山居號曰蒙溪幽居與獨孤及往來倡

酬時杜牧之亦云李侍郎於陽羨里富有泉石僕亦於陽羨粗有薄產作詩述舊叙懷

李逢吉

字虛舟係出隴西舉明經擢進士第後有八關十六子之號

李光弼

柳城人郭子儀薦其能授河東節度使後累功封臨淮郡王卒謚武穆光弼用兵謀定而

後戰能以少擊衆唐

室中興推其功云

李勉

字元卿京兆人少好學沉雅清整從肅宗靈武擢監察御史劾大將管崇韜背闕坐代宗時為

京兆尹政尚簡肅德宗興元中拜相所得俸賜皆分遺親黨身歿家無贏藏

李承

高邑人擢明經遷大理評事為河南採訪使判官尹子奇陷汴州拘承送洛陽覘得賊謀皆密

訴諸朝兩京平擢監察御史遷吏部尚書淮西黜陟使承使李希烈回言雖能立功恐後不可

制帝初謂不然後思其言擢拜河中尹晉絳觀察使時李希烈猶據襄州帝遣承往諭之慮其不受命欲以禁兵衛送承辭請以單騎入既至希烈舍之外館迫脅萬端承晏然誓以死守希烈不能屈密詔褒美之卒贈吏部尚書

李覲

射洪人少負俊穎讀書過目即悟舉進士工於詩時人比之陳子昂李白

李固

京兆人長慶中擢第後拜相當國有賢譽

李夷簡

字易之鄭惠王四世孫世居京兆累官御史大夫出為淮南節度以清直自開歷二鎮家

無餘貲臨終戒以母厚
莖母事浮屠母碑神道

李揆

字瑞卿隴西人性警敏善文章乾元中進禮部侍郎拜中書侍郎同平章事揆美風儀善奏對

帝曰卿門地人物文章當世
第一信朝廷羽儀時稱三絕

李抱真

抱玉從弟沈慮而斷抱玉屬以軍事代宗時授澤潞節度副使抱真以澤潞兵所走集乃籍戶丁給弓矢習射三年皆為精兵田悅反抱真戰走之又說王武俊共破朱滔累官檢校司空

李鄘

邕從孫舉進士累官淮南節度使吐谷承璀嘗為監軍薦之召拜同中書門下平章事鄘不喜由權倖進固辭以太子少傅致仕卒子拭仕至鳳翔節度使

李季芳

道州人代宗時處士刺史元結請於朝曰季芳介直自全退守庶遜文學為業不求人知

乞令州縣造舍給田免其戶役從之季芳卒結又表其所云

李復

字初陽以蔭為江陵司戶參軍衛伯玉才之表江陵令遷少尹歷饒蘇二州刺史李希烈叛荆南節度使張伯儀數為賊害朝廷以復在江陵得士心即母喪奪為少尹充行軍司馬佐伯儀

會伯儀罷改容州刺史兼本管招討使贈司空謚曰昭

李道古

嗣曹成王皋之子自司門員外郎入為少宗正兼御史中丞歷年最久乃因貪暴著聞恐

獲罪薦方士柳泌媚上自全卒以貽君上之害云

李陽冰

字少溫趙郡人以詞翰名乾元間為縉雲令修孔子廟自為文記之歲旱禱城隍與神約

不雨焚其廟及期雨雪足亦自為記秩滿退居
吏隱山後遷當塗令陽冰篆書尤著舒元興謂

其不下

李斯云

李端

趙州人李嘉祐之姪也大歷五年進士從郭曖
遊曖嘗進官大集賓客賦詩端最工錢起曰此

素為之請賦起姓端立獻一章又工於前客乃
服曖賜帛百疋後移疾江南仕至杭州司馬有

詩三

卷

李晉

字叔明閬州人德宗初吐蕃襲火井掠龍州晉
分將擊之以功加檢校戶部尚書梁崇義阻命

詔引兵下峽戰荆門敗其衆襄州平遷檢校尚
書左僕射德宗幸興元晉出家貲助軍悉衣幣

獻宮掖加太子

太傅封蘇國公

李繇

建中間為緡雲令有政聲邑有孝婦陶氏喪姑負土成墳一哭三絕繇為立碣請陸羽撰文以

表之其知

所重如此

李戡

字定臣渤海敬王七世孫也幼孤年十歲即好學掇薪自爨夜無燃膏默念所記年三十明六經舉進士就禮部試吏唱名乃入戡恥之徑返江東隱陽羨里人有鬪爭不決不之官悲詣戡以辨嘗集詩之類古者斷為唐詩以譏元白之失云

李商隱

字義山河內人世勣之裔孫舉進士調弘農尉又試拔萃中選補太子博士遷檢校工部

員外郎詩文瑰邁奇古世號其詩曰西崑體

李程

字表臣京兆人擢進士第一賦曰五色士流推之初調藍田尉縣有滯獄十年程單言輒判德

宗時為翰林學士
敬宗初拜相

李晟

字良器洮州臨潭人年十八從王忠嗣征吐蕃稱萬人敵克平朱泚收復京師號令嚴明公私

按堵其露布云臣已肅清宮禁祇謁寢園鐘簾不移廟貌如故德宗覽之泣曰天生李晟以為社稷非為朕也以功累官至司徒兼中書令封西平郡王子十五人知名者愿憲想聰

李儼

餘千人德宗時為左司諫方士桑道茂奏言奉天有天子氣上欲屠其城儼極諫乞殺桑道茂

上悟
乃止

李景略

幽州人德宗時遷大理寺直李懷光屯咸陽將襲東渭橋召募府計議景略曰殺朱泚還

軍諸道救策詣行在此轉禍為福也不聽既出軍門慟哭曰豈意此軍乃陷不義乎遂遁歸靈

武

李觀

字元賓李華從子也貞元中舉進士宏詞連中授校書郎卒年二十九觀善屬文不沿襲前人

時調與韓愈相

上下集三卷

李光顏

字光遠馬燧曰若有奇相終必光大解所佩刀贈之從高崇文平劍南數奪旗蹈軍出入

若神

李巽

字令叔贊皇人以明經補華州參軍歷河南江西觀察使持下以法吏不敢給順宗立擢鹽鐵

轉運副使再期年較所入增百八十萬緡累遷吏部尚書劉晏後善理財者巽一人也

李渤

字澹之刻志於學隱廬山久之徙少室元和初李巽韋况交章薦之詔以右拾遺召謝不拜洛

陽令韓愈遺書曰朝廷士引頸東望若景星鳳凰爭先覩為快渤始出家東都朝廷有闕政輒附章列上後以著作郎召渤孤操自將不苟合屢以言斥不少衰其節守義者尚之

李光

趙州人永泰初以河陽三城鎮遏使拜度支使與馬燧等破田悅洹水上悅將符麟以騎五百

降光大開壁門納之興元初授檢校尚書右僕射

李翱

字習之趙郡人文章見推當時中進士第元和初為國子博士史館修撰性峭鯁嘗面折宰相

李逢吉之過出為廬州刺史後拜諫議大夫卒謚文有文集

李藩

字遠翰其先趙州人少沉靜有檢局敏於學累官給事中憲宗謂有宰相器後拜門下侍郎同

平章事嘗言儉則足用敦本則百姓富反是則匱憲宗悅曰願相勗以保此言

李絳

字深之贊皇人舉進士累官翰林學士元和中與李吉甫同相吉甫善逢迎而絳鯁直嘗搜次君臣成敗十五種奏上憲宗為連屏張便坐每閱視之曰絳言骨鯁真宰相也

李畬

素立後少聰警仕歷汜水主簿遇事鋒銳雖厮童一閱輒記其姓名居址黜陟使路敬潛薦其清白擢西臺監察御史轉國子司業

李繁

元和十二年為處州刺史至郡即建廟學立顏子以下十人像其餘七十子皆繪之壁選博士弟子為置講堂俾之行禮肄習其中人士皆知問學韓愈為孔子廟記謂其為政知所先後云

李紳

字公垂敬玄曾孫為人短小精悍詩最有名時號短李元和初補國子助教擢翰林學士與李德裕元稹同時號為三俊累官至同中書門下平章事

李彥博

廣陵人學無不通尤好地理嘗為地志圖內自五侯九伯外至要荒蠻貊禹跡之所窮漢

驛之所通皆據書而畫隨方面以區別萬邦錯峙炳焉

李幼清

元和初為睦州刺史時浙西觀察使李錡竊貨財聚徒黨為反謀十年憲宗即位錡恐且

奮將遂其不善視部中郎守不為已用者誣陷去之幼清由是得罪上使御史按問館於睦自門及堂皆錡私卒為衛詞卒致其有間盜遂作廷臣猶用其文斥幼清南海上幼清行錡聚盜百人遮幼清於楚越之郊幼清戰且走乃得免左右官吏無幾盜就擒斬之既而錡伏誅論者謂宜還幼清以明其誣後更大赦始移永州

李中敏

字藏之隴西人元和中第進士性剛峭與杜牧李甘善其文辭氣節大抵相上下太和中

早中敏上疏指陳時

政得失文宗嘉納之

李愬

字元直歲子吳元濟逆命憲宗詔愬討之愬率

兵乘雪夜入蔡城擒吳元濟械送京師以功進

檢校尚書左僕射封涼國公鳳翔節度使詔代

兄愿武寧軍節度使旬月踐父兄兩鎮兄憲為

衛州刺史明恕正大按

獄全活無辜者甚眾

李寬

衡陽人元和中始于尋真觀初石鼓書院以為讀書之所刺史呂溫有詩

李興

安豐人父死廬墓上產紫白芝二本醴泉湧出柳宗元為作孝門銘

李遜

字友直隴西人客居荊州仕唐累官給事中故事天子以畸日聽政遜上書諫憲宗從其言後

為武忠節度使為政抑強植弱有績可紀弟建

隨兄客荊州事母以孝聞貞元間擢翰林學士

初建苦貧兄造為營丐使成就之故
建皆舉進士後雖通顯以清儉稱

李回

字昭度新興王六世孫穆宗時歷同中書門下
平章事以與李德裕善坐貶湖南觀察使尋以

太子賓客分司東都
後復湖南觀察使

李宗閔

字損之鄭王元懿四世孫擢進士舉賢良方
正與牛僧孺詆切時政觸宰相李吉甫惡之

補洛陽尉穆宗即位進中書舍人長慶初錢徽
典貢舉宗閔托所親于徽而李德裕李紳元稹
在翰林有寵於帝共白徽納私託取士不以實
宗閔坐貶劍州刺史改杭州後遷太子賓客由
是嫌怨顯結植黨相攻遂貽
縉紳之禍凡四十年不能解

李德裕

字文饒吉甫子穆宗初擢翰林學士凡號令
大典冊皆更其手敬宗朝獻丹宸六箴拜西

川節度使建籌邊樓累官門下侍郎封衛國公
自咸和後用兵宰相或不休沐或繼火乃罷德
裕從容裁決沛

然若無事時

李諤

字士恢長慶中海鹽令察俗利病施措當於民
開縣西古涇三百朔長豐閭二節宣水利民歌

其功時有丞李
頽亦舉其職

李聽

字正思洮州人敬宗朝歷義成軍節度使鄭滑
等州觀察使兼滑州刺史有惠政朝廷勅學士

宋申錫撰德政碑宋元符二年詹文守
滑獲碑於州署汚池中為築臺改置

李光進

代州刺史破賊有功弟光顏亦刺是州皆以
御史大夫領事軍中俱呼為大夫而以大小

別之

李漢

字南紀少事韓愈通古學屬詞雄蔚為人剛畧類愈愈愛重以子妻之擢進士第遷左拾遺唐

敬宗侈宮室舶賈獻沉香亭材帝受之漢諫曰以沉香為亭何異瑤臺瓊室乎

李遠

蜀人太和五年進士大中十二年十月令狐綯擬李遠杭州刺史上曰吾聞遠詩云長日惟消

一局棋安能理人綯曰詩人托此以寄興耳未必實然上曰且令往試觀之遠至亦不廢政事

李郃

延唐人太和初擢進士第一同榜者三十四人而蕭倣崔慎由崔鉉後並為相郃與劉蕡同應

賢良方

正科

李逢

劍州人文行俱高尤邃於易人稱為養正先生

李石

字中玉唐文宗開成元年因召對從容言曰陛下之政皆承天心惟宋申錫之枉久未原雪帝

慙曰我當時亦悟其失而詐忠者迫我以社稷計故耳使逢漢昭宣時當不坐此

李珣

字待價唐文宗開成間同中書門下平章事帝嘗自謂臨天下十四年雖未至治然視今日承

平亦希矣珣曰為國者如治身及身康寧調適以自助如恃安而忽則疾生天下當無事思所

闕禍亂

可至哉

李賀

字長吉七歲能辭章苦吟每旦出騎弱馬小奚奴背古錦囊隨後遇所得投其中暮歸母探囊

見所書多即怒曰是兒嘔出心乃已憲宗朝為協律郎一日畫見緋衣人駕赤虬持一板書云

上帝成白玉樓召君作

記遂卒時年二十七

李邕

字子元寧遠人唐太和二年舉進士第一時劉蕡對事切直考官不敢取邕曰蕡逐我留吾顏

其厚耶乃上疏極論之
帝不納後歷賀州刺史

李涉

字清溪洛陽人李渤之兄初隱廬山憲宗時為
太子通事舍人太和中為太學博士自號目溪

子詩

一卷

李羣玉

字文山澧陽人能詩大中間裴休入相薦之
云羣玉放懷邱壑吟咏性情叱妍詞於麗則

動清律於風騷冥鴻不歸羽翰自逸露豹遠迹
文采愈奇詔授宏文閣校書郎有詩集行世

李磻

字景望棧之子大中末擢進士累遷戶部郎中
分司東都黃巢陷洛磻挾尚書八印走河陽時

留守留光章為賊脅遣人就磻索印信拒不與
光章悟亦不臣賊高駢受偽命磻苦諫入為中
書舍人翰林學士乾寧中進禮部尚書同中書
門下平章事崔昭緯素疾磻諷劉崇魯掠其麻

哭之言礪懷姦不可相翌日下遷太子少傅昭
宗素所器遇決意復用之李茂真等上言深詆
其非罷為太子少師於是茂真及王行瑜韓建
擁兵闕下列礪罪殺之於都亭驛行瑜誅有詔
復官爵贈司徒謚曰文礪好學家有書至萬卷
世號李書樓所著文章及註解諸書甚多子沆
有俊才
亦遇害

李蔚

字茂休系本隴西舉進士書判拔萃皆中拜監
察御史累擢尚書右丞懿宗惑浮屠嘗飯萬僧

禁中自為贊偈蔚上疏切諫引狄仁傑姚元崇
辛替否所言譏病時弊帝不聽但以虛禮褒答

李甘

字和鼎第進士舉賢良方正異等擢侍御史鄭
注求宰相甘曰注何人欲得宰相白麻出我必

壞之

李文素

漢初人光啟間喪母廬墓墓生芝虎鹿馴其傍刺史戴奇以聞賜粟三百石

五代李承約

薊門人後唐明宗拜為涇州節度使克汾州節度毛璋諭以禍福璋從之明宗大喜遷黔

南節度使勸農桑興學校及去任黔人乞留之累官至左衛上將軍

李瓊

字子玉幽州人祖傳正涿州刺史父瑛涿州從事瓊幼好學涉獵史傳仕周累官太子洗馬嘗

為安州防禦使為治寬簡民立石頌德宋初召為太子賓客以右驍衛上將軍致仕卒贈太子

少師

李周

邢州人父矩遭亂不仕嘗謂周曰今世道未平汝當從軍旅以興吾門盧嶽徙家太原周送之

嶽曰子方順隆準眉疎散真將相也吾占天象晉必有天下宜留事晉後為節度使歷四鎮

欽定四庫全書

萬姓統譜
卷七十一

李愚

字子晦無祿人好學滄州節度使盧彥威以愚為安陵主簿劉季直幽昭宗於東內愚以書說

韓建使圖興復建不能用去之洛陽舉進士宏詞仕梁末帝見帝兄衡王不拜帝責之曰臣於王無所私豈宜妄有所屈莊宗滅梁拜翰林學士從郭崇韜伐蜀明宗時累拜中書侍郎同平章事愚為相欲依古以創禮請頒唐六典示百司州縣貢士作鄉飲酒禮時以為迂攝新喻縣時縣多大灾著以民居皆茅茨且侵軼官街乃令各復舊址屋覆以瓦又浚古堙井

李著

六自是火不復作

李章

廬江人初事楊行密為騎將後事南唐累遷雄武軍都虞侯善撫士卒勤於職務出為虔州節度使能禁戢左右賓禮僚屬移鎮廬州加中書令卒年九十

李克用

沙陀人少驍勇軍中號曰李鷄兒以平黃巢功累進爵晉王雄冠一時諸鎮畏之後養于

存孝等以叛被誅兵勢漸弱臨終三矢付莊宗曰一解潞州圍一滅梁報讐一復唐宗社言訖

而卒

李筠

太原人善騎射仕周屢立戰功為昭義軍節度使恭帝即位加檢校太尉宋太祖遣使諭以受

禪筠即欲拒命及延使者置酒遽索周祖畫象懸壁涕泣不已於是拒命為太祖所攻城陷赴

火死

李重進

周太祖之甥也生於太原累官歸德軍節度恭帝即位加檢校太尉淮南道節度使宋太

祖受禪加重進中書令重進治城繕兵以拒命太祖攻之城陷舉族自焚死

欽定四庫全書

卷七十一

李懌

京兆人舉進士後唐翰林學士時有請下學士院作詩賦為貢舉格者懌曰後生可畏豈能與英俊為準格間者多其知體

後遷刑部尚書分司洛陽

李徵古

萬載人南唐進士仕為袁州刺史五季時刺史宜春者二十有九皆武夫勲臣徵古獨以儒

術治之雖四方雲擾而絃誦不衰

李谷

潁州汝陰人厚重剛毅言多諳理舉進士從事華秦二州晉天福中擢監察御史累官開府儀

同三司進封趙國公
宋建隆初贈侍中

李琪

字台秀燉煌人舉進士博學宏詞任梁為翰林學士梁兵征伐四方詔書皆琪所撰下筆輒得太祖意梁亡仕唐累官至右僕射琪少以文章知名既貴乃刻牙板為金字曰前鄉貢進士李

琪常置
坐側


李景威

長陽人五代時仕高氏為水手都指揮宋建隆中假道以討張文表景威恐宋師襲已欲

伏兵攻之判官孫光憲不從景威扼吭而死太祖曰忠臣也命王仁瞻厚恤其家

李穀

周世宗時命為行營都部署從帝征南唐李景一鼓敗之



萬姓統譜卷七十一

欽定四庫全書

子部

萬姓統譜卷七十四

三

詳校官中書_臣徐志晉

主事_臣祁韻士覆勘

總校官知縣_臣楊懋珩

校對官中書_臣李 燾

謄錄監生_臣陳元熙

欽定四庫全書

萬姓統譜卷七十二

明凌迪知撰

宋李懷忠

涿州范陽人累官殿前指揮使從太祖征太原中流矢力疾戰益奮太宗時累遷侍衛步

軍都指揮使

卒贈侍中

宋

李璘

河間縣人晉開運末契丹犯邊有陳友者乘亂殺璘父及家屬三人乾德初璘隸殿前散祗候

友為軍小校相遇於道璘手刃友而不遁去自言復父讎案鞫得實太祖壯而釋之

李炳

涪州肥鄉人祖豐泰陵令父滔涪州團練判官炳初從邢帥薛懷讓辟為觀察吏使歷邠州鳳

翔判官拜殿中侍御史知舒州太祖征金陵以供億甚勞加侍御史

李繼勳

大名元城人性質直仕周為安國軍節度宋初加檢校太尉累遷至同平章事以太子太

師致仕弟繼偓亦有武勇官至龍衛右廂都指揮使

李符

內黃人博通時務有吏幹初仕漢為縣主簿入宋累官至右諫議大夫知開封府嘗為京西轉運

使奏便宜百餘條命著為令後出知春州

李成

吳人五代末以詩酒遊公卿間善摹寫山水酒酣落筆煙景萬狀世傳以為寶宋初衛融知陳

州聞其名召之成挈族而往以酣酒卒子覺

李萬超

太原人幼孤貧負販養母石晉時從杜重威拒契丹流矢貫手拔矢復戰神色自若屢立

功授洛州團練使宋初遷左驍衛大將軍

李洪信

晉陽人少善騎射初仕漢累官侍衛馬軍都指揮使乾祐中以羣小用事求解軍務周加

同平章事宋擢左驍衛上將軍致仕弟洪義仕漢周官至檢校太師宋加中書令

李進卿

晉陽人少驍勇從周世宗戰高平累官都虞候宋初以平蜀功累遷步軍都虞候終靜江

軍節度使延渥積功遷右領軍衛大將軍歷知數州

李謙溥

字德明孟人性慷慨通左氏春秋開寶中為濟州團練使及卒太祖甚痛惜之予允正累

官知定州允則有才略歷知潭滄雄鎮潞州治有聲

李漢超

字繼忠雲中人仕周為殿前都虞候宋初為齊州防禦使在郡有善政吏民愛之太宗時

遷應州觀察使漢超善撫士卒沒之日軍中殞涕

李崇

矩字守則上黨人純孝寡言有至行鄉里推服初仕周以功累遷作坊使宋初平澤潞及征

揚州皆有功後代趙普為樞密使加檢校太傅

李處耘

字正元上黨人父肇後唐檢校司徒以討賊戰死處耘初隸太祖帳下能臨機決事謀無

不中居常以功名為己任從平澤潞以功累遷樞密副使後出為淄州刺史其次女為太宗后

李繼昌

崇矩子性謹厚士大夫樂與之遊為峽州路軍都巡檢使以招安賊黨累遷至連州刺史

子遵昂尚公主

李繼隆

字霸國處耘子善騎射乾德中平蜀為果閬監軍及討李繼遷禦契丹皆有功太宗朝累

遷鎮安軍節度加至同中書門下平章卒謚忠武弟繼和知平涼軍屢上言邊務官至瑞州防

御使

李穆

字孟雍陽武人博學性至孝言行無矯飭五代周進士為右拾遺入宋累官翰林學士終叅知

政事好汲引後進弟肅舉進士累官保靜軍推官嘗作樂章九首其文甚工子惟簡多材藝不

樂仕進真宗時召拜太子中允致仕

李漢瓊

洛陽人資質魁岸有膂力五代時歷晉周累官左射指揮使宋初遷鐵騎第二軍都校累

遷檢校太尉卒贈中書令

李琪

河南伊闕人幼生長兵家得給事宣祖左右太祖以材力稱及受禪命補鎮職累遷效忠都虞

候領富州刺史後加左武衛大將軍

李度

洛陽人五代周進士入宋累官虞部員外郎直史館借太常少卿使交州未至卒度工於詩有佳句為時傳誦弟康亦善詩太宗時進士官至右贊善大夫

李瀆

鄆曾孫父瑩善詞賦周進士為蒲帥記室宋初為殿中侍御史瀆博覽經史不求仕進聚書畫嗜酒往來中條山真宗祀汾陰召見辭足疾不起一日有人至牀下誦詩云行到水窮處未知天盡時瀆曰吾逝矣頃之果卒魏野聞而哭之後六日亦卒人皆異之

李濤

萬年人慷慨有大志以經綸為己任工為詩筆札遒勁居家以孝友聞弟澣晉翰林學士孫仲容宋翰林侍讀學士官至戶部侍郎

李若拙

字藏用萬年人質狀魁偉尚氣有才幹初舉拔萃又第進士太祖時為著作郎後累遷史

館修撰歷兩浙江南
轉運使子繹第進士

李允則

寧州防禦使調寧羌冬人人信服後
人仰慕作六君子堂允則其一也

李廷珙

連州人開寶間從潘美平南
漢以武功累遷刑部尚書

李黃

本建安人有清節仕江南李氏至諸司使宋初
授官不拜舉進士為衢州司理叅軍以母在江

南棄官歸後其子虛已亦舉進士歷官通判洪
州時黃春秋高黃母尚無恙虛已雙舉迎侍黃
至豫章樂其山水曰此可以終吾身也遂於東
湖築第以居焉虛已官至戶部侍郎與子壻晏
殊有唱和集

李繼宣

開封人乾德中以材武補殿直年纔十七命
捕虎峽州凡殺二十餘生擒二虎一豹以獻

遂授以邊任所至有戰功嘗追北敵於新城斬其賀恩相公監兵高陽率兵入敵境燒聚落獲生口以歸時敵方寇瀛鎮間聞之遂引還初繼宣承受定州路奏事已嘗入北境殺獲甚眾又從崔彥進曹彬李繼隆米信出重進與契丹戰未嘗不捷至是敵畏之擢任鎮州鈐轄而主帥傅潛怯懦有警請行皆為所抑及與高瓊同主軍事遂逐敵眾越界河嘗與秦翰楊嗣延昭張斌遇於威虜軍臨陣馬中矢凡三易之嗣輩皆引去獨繼宣整所部接戰薄暮至營所詔稱獎之積官至四方館使康

州刺史卒年六十四

李昉

字明遠饒陽人父超晉集賢殿直學士昉舉進士累官中書侍郎平章事以司空致仕卒謚文正昉和厚多恕不念舊惡太宗嘗稱為善人君子為文章慕白居易有文集五十卷

李至

字言幾真定人沉静好學善屬文舉進士累官翰林學士叅知政事太宗親征至謂宜養威蓄

銳示敵人以閒暇後以目疾免

真宗時復叅大政卒贈侍中

李宗

諤字少能屬辭善書始以蔭補太廟齋郎試以詩賦立就秘書省正字太宗親擢為國子

監丞淳化中改太常博士判禮院子昭迥賜進士官至屯田員外郎昭遠太子中舍

李宗

諤字昌武昉第三子七歲能文舉進士累官翰林學士為人風流儒雅內行淳至事繼母以

孝聞與弟宗諒友愛所著有文集及內外制次子昭述賜進士官至尚書右丞從子昭邁能文

授館閣校理累

官工部郎中

李濬

信都人父超有陰德濬舉進士嘗為御史臺推直官屢上書言事遷開封府推官擢樞密直學

士後為右司

郎中知秦州

李沆

字太初炳之子太宗時進士為右補闕知制誥上嘗稱其風範端凝真宗時拜相日取水旱盜賊奏聞曰人主少年當使知四方艱難不然則留意於土木禱祠之事矣王旦初以為細事後果驗歎曰李文靖真聖人也至於焚封妃之詔奪西夏之謀不用浮薄不市私恩可謂正大光明矣張詠曰吾榜得人最多謹重雅望無如李沆故論宋初得大臣之體者沆為首稱卒謹文靖

李重誨

金城人初仕契丹潘美與戰重誨被擒太宗召見補鄧州都指揮使雍熙初為忻州都巡

檢緣邊十八砦招安制置使弟重睿歷官澄州團練使

李斌

青州人太宗時補御龍直副指揮使坐受秦王廷美饋遺貶曹州都校累官萊州淄州團練使勤於政理人服清慎至道初拜桂州觀察使仍判淄州及代吏民不忍其去鄰境亦上其善政

詔書褒

異之

李覺

字仲明本京兆長安人曾祖鼎唐國子祭酒唐末避亂徙家青州益都鼎生瑜本州推官瑜生

成成生覺太平興國初舉九經為秘書丞太宗以孔穎達五經正義刊板詔覺校定太宗視學覺講易泰卦述天地感通君臣相應之旨上甚悅詳校春秋正義成改水部員外郎子宥祥符中進士為祠

部員外郎

李惟清

字直臣下邑人開寶中以三史解褐涪陵尉累官西京轉運使太宗將大舉取幽州惟清

以為兵食未豐不可輕動至道初同知樞密院事子永錫光祿寺丞永德殿中丞

李及

字幼幾新鄭人舉進士累官樞密直學士判吏部銓出知杭州及資性清介治尚簡嚴喜獎薦

下吏而樂道人之善在杭數年比去惟市白樂天集後官至御史中丞

李紘

字中剛楚邱人第進士知歙剡縣治有惠愛累遷龍圖直學士知秦州其從父昌齡太宗時進

士累官參知政事昌齡兄昌圖國子博士弟昌言太子中舍昌言子晉卿仲卿耀竝進士及第

李虛已

字公受建安人父寅初仕南唐歸宋遣其子養母仕為衢州司理參軍虛已第進士累官

知遂州以治最聞太宗賜以手書虛已因獻詩自陳父子遭遇榮及祖母太宗悅遂賜五品服及其祖母錢五十萬緡累遷至工部侍郎精於詩律有雅正集十卷弟虛舟以孝友清慎世其

家舟子寬尚書金部

郎中定司農少卿

李承矩

字正則太宗太平興國五年知河南府時調丁男百十輩轉送上供綱承矩以為橫役奏

罷其事徙知潭州凡六年因固屢空詔嘉獎之入為六宅使

李含章

自少隱居土山好學攻文詞器度凝重每遇良夕輒吹鐵笛吟嘯自若識者異之宋太平

興國中擢進士上第嘗判戶部度支歲計充義
奏免諸道供輸一年尋謫外祥符末起判三司
乞便郡出知本州政崇簡易訟獄大省在郡二
年罷含章數以戇直得罪益高放嗜酒遨遊山
水間哦詠自遣仁宗即位起知江陰軍數月卒
所著有仙都集五卷孫孝先以含章蔭累官虞
部員外郎通判池杭二州力學好修所交如
李太伯楊次公輩皆世名士有柯山集十卷

李重貴

河陽人嘗給事晉邸及即位累擢至衛州團練使淳化中遣將五路討賊遷重貴帥麟府

得對因言賊居沙磧逐水草無定止聞兵勢甚則遠遁矣追之或糧不能繼欲守又彼無堅壘若未能平賊將何顏以見陛下也太宗雖然其言以師期既定強遣之卒無功而還咸平三年戎人入寇范廷召戰退康保裔陷賊獨重貴與張凝力戰却賊全軍以歸凝議上功狀重貴曰大將陷歿我輩計功是誠何心真宗聞而嘉歎特加階邑以疾求致仕授左羽林大將軍卒年

五十
九

李玘

宗城人力耕事母母卒讓田與弟廬墓所晝夜號泣負土築墳又以二代及諸族父母豪墓未

盡禮築之凡三年成六墳不食肉衣帛不預人事墳成復留守墳三年常令兒子賣藥以自給

天禧中知府張知白以狀聞詔賜粟帛里中有母在而析產者聞玘被旌兄弟慚懼復同居

李垂

字舜工聊城人咸平初進士累官修起居注時丁謂執政未嘗往謁或問其故答曰謂恃權怙

勢必遊朱崖吾不欲在其黨中遂補外任還朝有勸其謁時相者答曰我若昔謁丁謂則為學士久矣今已老大見大臣不公尚欲面折之烏能趨附乎終知均州

李諮

字仲詢新喻人幼以孝聞景德間舉進士累官戶部侍郎知樞密院事性明敏周知世務處煩劇若閒暇吏不敢欺在樞府專抑僥倖革濫賞人以為稱職卒謚憲成

李延渥

咸平中知瀛州契丹大兵來攻延渥率州兵拒守契丹遁去擊死者三萬餘傷者倍之

李昭述

字仲宜以蔭為秘書省校書郎召試學士院賜進士出身為刑部詳覆官累遷河北轉運

使徙湖廣潭州戍卒憤監軍酷暴欲搆亂或曰如李公長者何可負事遂寢昭述聞之以戒監軍自是不復為暴比去東遮道羅拜李氏居京城北崇慶里七世不異爨至昭述稍自豐殖為族人所望然家法亦不墮

李端懿

字元伯七歲授如京副使侍真宗東宮尤所親愛嘗解方玉帶賜之稍長出入宮禁如家人七遷齊州防禦使杜衍為樞密擇外戚子弟試外官迺以端懿知冀州為政循法度民愛其不擾徒華州觀察使

李遵勗

字公武舉進士真宗大中祥符間召對便殿尚萬壽長公主出知澶州在郡會河水溢將壞浮梁遵勗督工徒七日而堤成遷昭德軍節度觀察留後拜寧國軍節度使

李行簡

字易從同州人少苦學坐石誦六經嘗至夜分雖寒暑不渝又聚木葉學書筆法道勁舉

進士登第累擢至龍圖閣待制真宗數幸閣命講易因訪大臣得否行簡必稱其所長人以為

長者仁宗即位進給事中以疾求外知河中府徙虢州卒年七十一有集二十卷行簡端重不

妄交一介不取諸人雖善亦人莫知者諸子非冠帶莫敢見聚書萬卷多其自錄人謂之書樓

偶夢綠衣吏持簿至公府自丁謂而下皆錄其官壽至行簡云官議大夫及疾歎曰官給事中

已踰分矣

李仲容

字儀父濟陰人唐郇王禧十三世孫祖濟國初為兵部尚書仲容少好學咸平五年登進

士第累擢知制誥時翰林學士員不足眾謂當次補而不為宰相所喜乃罷知制誥為給事中

集賢院

學士久之除翰林侍讀學士兼龍圖閣

學士官至戶部侍郎卒年七十子景倫景賢景

行景仁集制草為冠鳳集十三卷仲容性質醇

易喜讀書善記賓至多命酒談笑而不及執利

李昌齡

字天錫應天府人太平興國二年登進士第

累擢樞密直學士御史中丞至道二年參知

政事真宗即位為戶部侍郎坐交結中人貶許

州行軍司馬昌齡嘗知廣州無廣譽及起廢御

史屢彈其宿負除知梓州改河陽又改光

州以秘書監致仕卒年六十二子虞卿

李庚

天禧中守明州善地理之學有幻術在郡

浚東錢廣德二湖以溉田民利立祠祀之

李衡

字叔達宜春人唐西平郡王晟之雲孫大中祥

符元年登第官至屯田員外郎嘗倖筠陽寬慈

不擾後以子贈特進子士安

士燮孫珪政和八年登第

李士安

字永和以特奏同學究出身為人不妄喜怒累為州牧後請老得養生之術視聽不衰年

九十七卒官至朝奉

大夫任子孫凡四人

李士燮

字和甫初名梁登慶歷六年第後改今名為人剛正不撓所至吏民畏愛嘗知彬州人未

嘗見其有笑容仕至職方郎中

李繹

字縱之京兆萬年人幼謹愿自修舉進士中第累遷兵部郎中江淮發運使內出絹五十萬匹

責買於東南繹曰百姓饑不宜重擾輒奏罷之

甫半載漕課視常歲增五之一遷太常少卿再

知延州繹所至頗稱治自以久官在外意不自

得作五知先生傳謂知時知難知命知退知足

也終諫

議大夫

李欣

字公愉，莆田人。曾祖丹，唐宗室。蔡王蔚八代孫。為虢州刺史。欣第太平興國八年進士，歷階州。

推官。以清謹聞，召對擢通判耀州。時關輔盜賊充斥，欣陳討捕之策，踰月悉平。改知儀州。忽傳寇至，民將避去。欣登城顧瞻，笑曰：「何狂寇敢犯我邪？」及探騎至果渭州，兵討虜還耳。拜屯田員外郎。出知解州，歷廣東、廣西、京西轉運使。始仁宗為太子，欣處師儒，及即位，賜璽書褒問，除衛尉卿，遷諫議大夫、卒子八人。宗元宗閔相繼登第，餘以奏補入官。

李巽

字仲權，光澤人。博學能文，有土鼓等賦。舉進士，與王禹偁、善禹偁有送。巽赴官序為江西提刑。明恕第一遷兩浙運使，郡人登進士自巽始。

李詳

字自明，光澤人。誥之弟。幼警悟，善屬文，議論純正。知潯州興學校，革夷俗，遷太僕寺丞。

李維

沆之弟舉進士累官翰林學士承旨仁宗時為尚書左丞維博學以文章知名至老手不廢書

嘗預修續通典冊府元龜卒贈右僕射

子師錫虞部員外郎公謹太子中舍

李防

字智周內黃人舉進士為莫州軍事推官累官至右諫議大夫知永興軍防精力過人好建明

利害所至必有論
奏朝廷頗施行之

李載

字伯熙黎陽人少苦學隆暑讀書著足於水雖得疾不舍去登進士知大名冠氏縣守呂夷簡

入相薦其材累官歷六州一以寬厚稱載性篤孝侍母病不解帶至病亟不能食載亦不食母

知之為

強食

李清臣

魏人少孤事母盡孝七歲知讀書日數千言暫經目輒誦登皇祐進士歐陽修壯其文以

比蘇軾歷官尚書右丞門下侍郎徽宗嘗欲息朋黨清臣與執政者協輔上意為曾布所陷出

知大名府所

著有淇水集

李琮

字獻甫江寧人慶厯間登第調寧國軍推官累遷戶部侍郎歷知湘洪杭瀛等州長於吏治與

蘇軾黃廷堅遊有詩集卒贈太師子回登元祐進士紹興初為叅知政事回弟耕能詩慕陶淵

明棄官不仕

號臺山居士

李渭

西河人後家河陽進士起家為臨潁主簿天聖初上治河十策累官軍器局副使歷知原環慶

三州時詔舉勇略任邊者乃從渭蓋州兵馬鈐轄領惠州刺史

李迪

字復古濮州鄆城人少從柳開學為古文開曰公輔器也舉進士第一累官資政殿大學士同

平章事當章獻太后臨朝時正色危言時稱賢相以太子太傅致仕卒贈司空侍中謚文定仁

宗篆其墓

碑曰遺直

李東之

字公明迪長于明曉典故賜進士累官龍圖閣直學士以太子太保致仕出都門即幅巾

白衣見客子孝基始登第唱名仁宗顧侍臣曰此李迪孫邪能世其家可尚也歷知數州皆有

治績

李之才

字挺之青社人性朴直為古文章語直意邃師穆修受易修之易受之种放放受之陳搏

其圖書象數變通之妙秦漢以來鮮有知者之才嘗權共城令邵雍傳其學官至殿中丞

李宥

字仲巖威孫父覺舉九經起家歷官國子博士直史館宥善屬文不雜交遊舉進士歷官諫議

大夫知江寧府有善政後判留司御史臺性清介好獎拔士人矜恤貧者既死家無餘財官賜

錢百萬

李師中

楚邱人年十五上封事言時政舉進士累官河東都轉運使在官不貴威罰務以信服人

包拯參知政事或云朝廷自此多事矣師中曰包公何能為王安石眼多白他日亂天下者必

斯人也後二十年言乃信

李好義

下邳人祖師中忠州團練使父定一興州中軍統制好義善騎射討蕃部有功開禧中為

興州正將與兄好古等誅叛臣吳曦以忠義著名

李士衡

成紀人後徙家京兆進士及第歷知數州累遷刑部侍郎嘗為三司使真宗作寬財利論

以賜之仁宗即位拜尚書左丞子玉緒累官司
農卿知華州致仕居官廉靜不為矯激家多圖
書集歷代石刻
為數百卷藏之

李用

和

字審禮杭州人章懿皇太后弟累官彰信軍
節度使檢校侍中卒贈太師封隴西郡王初
仁宗以太后不逮養故於外家褒寵特厚用和
列位將相能小心敬默推遠權勢論者以此稱
之子璋瑋珣皆至
大官能守其家法

李觀

字彥禮南陽人通五經生徒嘗數百人曾鞏鄧
潤甫皆其高弟為文章自成一家天下知其名

皇祐間范仲淹薦試太學助教後除太學說書
既沒潤甫上其退居類藁皇祐續藁并後集詔
官其子

參魯

欽定四庫全書

萬姓統譜
卷七十二

十三

李陽孫

崇仁人慶厯初為豐州簿官滿徒走而歸晏殊深器重之贈以詩曰不忍與君別憐君仁

義人三年官滿後依舊
一家貧仕至殿中丞

李郭

宜黃人文學浩博嘗著比事罪言三十篇欲遷都建康為興復計不遇退而著書人號為書廚

著文集數十萬
言有緯文瑣語

李建中

字得之益州人幼好學太宗時進士累官太常博士嘗表陳時政後歷知曹解頴蔡四州

終判太府寺建中性簡靜恬于榮利善書札草隸篆籀俱妙有集三十卷子周道進士及第

李旼

華陽人以學行為鄉里所稱初蜀士知向學不樂仕宦知州張詠敦勉就舉旼遂登第累官知

榮州自號谷子所著歌詩雜文及谷子
總百卷張詠語錄三卷卒年八十七

李絢

字公素依政人累官起居舍人龍圖閣直學士仁宗春秋高未有繼嗣因侍祀高禩還奏賦大

指言遠嬰寵近柔良則子孫蕃衍仁宗嘉納之

李肅之

迪從子歷知數州遷江淮發運使後以龍圖閣學士知鄆州肅之內行修飭母喪廬墓撫

幼孤弟承之至成立神宗稱其一門忠孝承之有志節中進士累官樞密直學士知青州先是遷龍圖直學士懇辭乞授兄詔竝遷焉

李孝基

字伯始東之子舉進士晏殊富弼薦其材任館閣後一見之孝基曰名器可私謁邪竟不

往知雄邱判閬州知舒州隨州所至雖劇事來亟斷不為證佐回枉累官光祿卿與父東之同

謝事人以比二疏

李深

字叔平光澤人父誥慶歷二年進士登第官至太常博士陳瓘稱其真率樂易有古人風深弟

熙寧九年進士為勅所詳檢役法文字因與蔡京章惇廷爭奪一官已而叙復原官遷朝散郎以言事罷崇寧中安置復州入元祐黨籍有杭州集二十卷弟勉字安道元祐九年第進士知尤溪順昌縣素負氣節多忤於時遂謝事休致亦入黨籍

李傑

邵陽人事親孝臨財廉周給貧困邦人德之列舉孝行節義十事守宰以聞詔旌表其門張栻為題其額

李緯

字仲文以父廣東提點刑獄遺恩補借職累擢至西上閣門使卒年七十贈引進使陵州團練使子師中積中純中緯嘗知渭州請修籠竿城瓦亭寨及以籠竿為德順軍范仲淹韓琦遂舉

緯知德順軍招蕃部內屬者數百帳葛懷敏既陷歿元昊因攻瓦亭籠竿皆不能下雄州未有常平倉緯知州以賜公使錢置焉及民饑遂獲均濟

李堯

輔

字彥夫隨州人好學多積書歐陽修嘗造其家得昌黎集六卷讀之嘗撰李氏東園記有

曰隨近在天子千里內幾百年未出一士獨城南李氏為著姓家多藏書訓子孫以學予為童子與李氏諸兒戲其家見李氏方治東園已而予客漢沔游京師復歸公佐引予登亭公佐好學有行鄉里推之予益友也公佐堯輔子與歐陽修相善

李文淵

淵

富順人治平初進士累官朝議大夫蔡京奇其才欲用之乃謝病還鄉

李潜

字君行興國縣人志識警拔治平中第進士仕為洪州司理參軍性孝丁父憂終喪足不至私

室歷官至蘄州初如京師其子弟請貫開封籍
取應潛不許曰欲求事君而先欺君可乎其後
三子連中進士弟渾
及渾子存皆有時望

李之純

滄州人舉進士熙寧中累官成都路轉運使
成都歲發官米六千石損直與民言者謂惠

下損上之純言蜀人恃此為生奈何奪之
事遂止累遷御史中丞後出知單州卒

李之邵

建炎初為新喻武尉隆佑太后幸虔州扈從
後軍叛之邵拒之兵敗不屈大罵賊殺之賊

酋壯其言誅
害之邵者

李京

字伯升趙州人進士中第歷平定軍判官冀州
推官奉法嚴正遷監察御史以日食上疏切直

仁宗嘉納授右正言數上書言
事卒錄其子諱為郊社齋郎

李之儀

趙州人工於尺牘蘇軾以為得發遣三昧仕為樞密編修官後罷歸寓潁昌代范純仁作

遺表帝讀之悲愴不已之儀自號姑溪老農有文集六十卷

李兼

宣城人博學工詩楊萬里推許之知台州居官有守既卒吏民為之巷哭罷市自號雪巖所著

有詩文及郡志

李承之

字奉世肅之弟性嚴重有志節登進士調明州司戶叅軍郡守任情撓法人莫敢忤承之

毅然力爭王安石稱之召見神宗語執政曰承之言制置司事甚詳非他人所及改京官後累官察訪使時郡縣昧於奉法歛羨餘過制承之悉裁正其數累擢樞密直學士

李及之

迪從子登第通判安肅軍後以大中大夫致仕嘗撰次唐史有益治體者為君臣龜鑑八

欽定四庫全書

萬姓統譜
卷七十二

十六

十卷 卒年八十五子孝稱為大理少卿連奏獄空仕至工部尚書

李由皋

青田人通九經試春秋舉業應童子科淳熙間中選

李如京

崇德人博文強識天文地理歷數歷學兵機之事靡不該通所著有東園叢設學書

李堯言

江陵人熙寧中除侍御史未七十即上印綬其兄立言亦自澶州納政時又有李疎亦引

疾同時里居郡人為之語曰元豐濟濟稱多士南郡堂堂有三李萬鍾於我何加焉一瓢落在其中矣

李懷道

元豐中知上高始至建學宮不逾年執經而至者數十百人其政不苛而肅賦役獄訟不謬

於府蘇轍城以為有古之道其所以得民者非復世俗之吏蓋紀其實云

李漢臣

字仲良荊州人兄元叔太史黃庭堅之姻庭堅謫黔州漢臣懇款辛勤問疾不懈漢臣求

科舉不遂乃依駙馬曹詩門以恩補郊齋郎調漢陽尉獲盜數十人或曰此可市美官漢臣曰

吾寧殺人為利邪再調上饒尉改理定令

李兌

字子西臨潁人登進士第積官尚書右丞轉工部尚書致仕兌歷守名郡為政簡嚴老益精明卒謚曰壯從弟先由進士積官秘書監致仕兌尚無恙事之彌篤子庭玉年六十四棄官歸養

人賢其

家法

李周

字純之馮翊人登進士調長安尉轉洪洞令有善政神宗時以司馬光薦召至訪以禦邊之術

累遷集賢學士知邠州徙鳳翔河中府周自為小官沉晦自匿未嘗私謁執政

欽定四庫全書

萬姓統譜
卷七十二

十七

李鷹

華州人幼孤能奮立嘗以文謁蘇軾於黃州軾謂其筆墨瀾翻有飛沙走石之勢嘗閱其所著

曰張耒秦觀之流也鄉舉試禮部軾典貢失之賦詩以自責

李受

瀏陽人治平中累官至天章閣待制兼侍讀神宗立進給事中龍圖閣直學士上言臣在先帝

時年已七十不敢竊祿以自安今又加數年筋力憊矣惟陛下哀之於是拜刑部侍郎致仕卒

年八十贈

工部尚書

李常

建昌人皇祐間舉進士熙寧中為右正言時王安石方更法常言其不便哲宗時上言七事拜

御史中丞少與兄弟讀書廬山白石僧舍既擢第留所抄書萬卷於室名曰李氏山房蘇軾歎

為仁者用心為記其事云

李謹交

成都人幼穎異讀書輒能暗誦父師怪而罷之年十四舉進士仁宗命中黃門引入內賜

坐嘗進牡丹詩官至鄂州觀察推官

李師古

緯之子舉進士累官河南都轉運使言時政得失呂惠卿以為固上貶和州團練使在官

不責威罰務以信服人去之日民遮道泣留杜衍范仲淹富弼皆薦其有王佐之才

李亮工

舒州人舉進士以文鳴縉紳間與蘇軾黃庭堅遊有詩唱和

李元中

舒州人舉進士工書翰追蹤鍾王與李公麟李亮工同時登第號龍眠三李

李謙亨

曲沃人英宗時以儒進歷內臺御史時創西山寺謙亨與御史四人上疏切諫決杖文面

安置於奴兒由是海內知名後召還授浙東海右道廉訪使封隴西郡侯卒謚忠肅

李子筠

為餘姚主簿號李水晶初有茶商航海與海舶相遭更相疑為盜鉦鼓交鳴格鬪殺傷十

餘人繫理蕭山吏求主名不能得連歲年不決時趙抃守越檄子筠治之子筠曰犯時不知在律勿問具聞於州杖而遣之抃以為處議當於法也甚任之

李敏之

字仲通迪之後博學好古母疾衣不解帶者累月及居喪哀毀過甚以蔭歷補瑞金縣主

簿會劇賊戴小人卒平之遷衛尉寺丞為江寧縣有循吏風

李惇

字子修陽信人熙寧中青苗法行計息推賞否則黜秩吏畏罪希進欲散惟恐不多惇願

知祥符縣獨貸三之一宰相怒甚遂通判廣信軍

李昭玘

字成季濟南人少與黽補之齊名擢進士通判潞州潞民死不墓昭玘斥官地畫兆寢具

棺衾作文風曉之累官提點京東刑獄坐元豐黨奪官居間十五年貯圖書十囊命曰燕游十

友紹興初復官使陝西有車吉被誣盜釋之後遇於道獻名馬笑却之

李公

麟舒州人元祐進士為泗州錄事參軍公麟好學博雅長於詩多識奇字自夏商以來鍾鼎

尊彝皆能考定世次別辨別款識為考古圖善丹青妙絕冠世黃庭堅謂其風流不減古人弟

公權公寅亦舉進士有名

李平西

平江人伯父綱累官輕車都尉父純皇祐中進士有賢名平西元符中進士知澧州專務

德化集民訓以孝弟勸事農桑化洽州邑累遷樞密院承旨金人寇汴平西與宰相李綱奏守禦策金再入寇又乞詔諸道勤王兵決策一戰時宰相何臬不能用

李若水

洺州曲周人。以上舍登第。為太學博士。靖康初。金人入寇。選若水為使。見尼堪於雲中。纔

歸。兵已南下。尼堪來攻。汴以若水為吏部尚書。金人邀帝出郊。計中變。逼帝易服。若水抱持而哭。淚雨下。厲聲大罵。不屈。遂遇害。謚忠愍。

李椿

字壽翁。洺州永年人。父升。進士起家。為吏。有廬名靖康。中金人破汴。以刃迫其父。升前揖之。與父俱死。椿奉繼母。避地南走。仕為吏部侍郎。知太平州。以敷文閣待制致仕。椿長于易。凡措諸行事者。皆易之用。曾孫芾死。節於潭州。

李華

字實夫。溧陽人。父沒。居喪毀瘠盡哀。母疾。華衣不解帶者十餘年。有田十餘頃。穀貴。平價食其一方。大觀政和間。蝗數害稼。不食其田。子朝正累官至平江府。

李植

泗州臨淮人幼明敏篤學靖康初補迪功郎湖南向子諲使督犒師銀兩數百艘自淮趨濟卒

以計達高宗大悅曰得一士如獲拱壁豈特軍餉而已累官戶部員外郎秦檜當國植忤祠奉親十九年不仕母卒廬墓有白鷺朱草之祥後歷知數州以寶文閣學士致仕卒謚忠襄有臨

淮集

十卷

李彌遜

字似之吳縣人弱冠登第紹興初遷起居郎論事鯁切後廷爭沮秦檜和議上疏乞歸田

以徽猷閣直學士知端州改知漳州廢絀以沒無怨懟心所著有奏議外制議古及詩數十卷

李彌大

彌遜弟崇寧初進士為校書郎累官刑部尚書多所建明建炎初試戶部尚書兼侍讀後

知靜江府奏廣西邊防利害入為工部尚書未幾罷去

李熙靖

晉陵人舉進士徽宗時歷中書舍人兼侍講靖康中張邦昌攝國熙靖即移病不出邦昌

迫令權直學士院熙靖力拒之以憂憤廢食而卒贈端明殿學士

李端行

字正達無錫人與弟尚行入太學俱有聲大觀中同登進士呂頤浩嘗師之逮貴猶執弟

子禮為太學博士作詩詆蔡京出宰鄞縣發憤終身不復仕

李衡

江都人幼博學為文操筆立就紹興中進士歷州縣專以誠意化民累官至侍御史改起居郎

以秘書修撰致仕

李彭年

廣德人紹興中進士以二親沒於兵感慕不已蔬食終身郡守洪興祖聞於朝詔旌表其

門人號其里曰旌孝

李若谷

字子淵豐縣人少孤遊洛下因莖其考妣于緱氏而占籍焉舉進士累官至叅知政事卒

謚康靖子淑賜童子出身累官翰林學士孫壽朋復圭皆仕於時

李格非

字文叔濟南人舉進士累官禮部員外郎嘗著洛陽名園記謂洛陽之盛衰天下治亂之

候也其後洛陽陷於金人以為知言格非工於辭章嘗言文不可苟作誠不著則不能工妻王氏拱辰孫女李清照自號易安居士皆能文

李參

字清臣鄆州須城人以蔭屢更外任喜發摘奸伏不假貸事至即決雖簿書纖悉不遺時稱能

吏累官至尚書右丞

李持正

字季東少與諸父宗師馳名大學號大小李宗師政和二年進士第二持正五年進士歷

知德慶南劍潮陽三郡在南劍日適魔寇入州境諸將督捕急持正力爭以愚民無知戮其渠

魁數人餘悉令歸業官終朝請

大夫于三人皆以父任補官

李伯宗

河陽人第進士歷大理卿刑部侍郎言今情重法輕者許奏請情輕法重者不得焉恐非

仁聖忠恕之意徽宗納之以顯謨閣待制卒贈光祿大夫謚曰榮

李彥仙

彭原人有志靖康初應募勤王以功授石壕尉堅守三觔屢敗軍兵復知陝州極力禦

敵大敗之彥仙以孤城無援城陷走渡河因投河而死贈彰武軍節度使謚忠威

李浩

絳州人務學通兵法以破僂智高功為廣西都監嘗著安邊策神宗時又以討黔江蠻累官知

河州後歷廊延太原永興環慶路副都總管

李翼

新秦人宣和末為代州西路都巡檢使屯崞縣金人取代翼堅守統領崔忠夜引金兵入城翼搏戰不敵被執尼堪誘之怒罵不屈而死

李永奇

青澗人世襲蘇尾九族巡檢金人陷延安授永奇及其子顯忠官永奇泣曰我宋臣也乃

為彼用邪會劉豫令顯忠率兵赴汴永奇密戒曰汝得乘機即歸本朝毋以我故貳其志及豫廢金授顯忠知同州顯忠以計執金帥薩里罕急遣人告永奇挈家出城為金人所及家屬二百口皆遇害

李光

字泰發上虞人崇寧中進士師事劉安世欽宗時權右司諫高宗時為吏部尚書叅知政事力詆秦檜誤國謫瓊州安置子孟傳累官太府丞終直寶謨閣所著有盤溪宏辭葉左氏說雜志

九十
餘卷

李椿年

浮梁人政和間進士歷司農丞度支郎中後知婺州致仕初母喪於中都徒步護喪歸塋

有甘露之祥所著有
易傳十卷文集十卷

李朴

潛子紹聖初進士仕為西京國子監教授以嘗言孟后不當廢事勒停尋以陳瓘薦徽宗召對首言士大夫從偽學敗壞心術朴性鯁直操履勁特天下高其名靖康初累遷祭酒高宗召為秘書監未至而卒
有章貢集二十卷

李涪

字浩然南豐人其先居上黨駙馬都尉遵勗曾孫仕為鄂州崇陽令靖康之難奮然募兵以應勤王詔至蔡州與金人戰死之高宗錄其忠官其子

李大

字仲謙新喻人紹聖間舉進士累官知虔州宣和末金人犯京師大有募兵勤王鼓行而

前淮南歌曰天下姦臣皆守室虔州太守獨勤王後知衢州州有宿寇猖獗大有下車寇即平

李邈

字彥思清江人少有才略見事風生宣和間知霸州時童貫將連金人夾攻契丹邈上書言不

可忤貫免官久之復起知嚴州貫收復燕山邈歎曰禍亂自此始矣金人犯京師詔趣入見出知真定府金人至邈且戰且守相持四旬城破巷戰被執遂遇害高宗贈昭化軍節度使謚忠壯

李階

字進祖深之子崇寧二年禮部第一特奏名安忱對策言使黨人之子魁南宮多士無以示天

下遂奪階出身遇赦復官建炎初攝臨安府比較務州卒陳通脅階叱之遂遇害事聞贈右丞

事郎與
一子官

李德昭

字子晉莆田人崇寧中第進士自廣東提舉召對留為度支郎官建炎初出知建州卒三

百人先屯廣州至是聞葉懷賊平徑還郡官疑其從叛或請殺之德昭力言不可得全活苗傳劉正彥之亂列郡戒嚴韓世忠既執正彥於浦城德昭分兵守要衝獲傳檻送京師尋謝病歸建人祠之
白鶴山

李丹

字炳文新昌人美儀容善談論聶昌薦用於朝自為士人以至累典藩郡官至朝請大夫田園

未嘗增益故晚詩有二頃田園只舊時之句徽廟召之欲擢以近職及至陛忽有物螫其頂痛不能對遂止既出視之蝎也

李享伯

字安正龍溪人登治平第調福之懷安尉累遷奉議郎知廣州東莞縣縣有盜累攻莫敢

誰何享伯掩捕之以功遷朝散郎知梧州興學勸士再轉朝奉大夫用薦知澧州崇寧間遷永

州團練使知全州諸蠻皆服其威名終忠州防禦使年踰六十即掛冠歸

李升

廣平人起家為吏有廬名靖康中金人破汴以刃迫其父升前捍之與父俱死其子徙家衡州

李奉政

藤州人博學能文紹興中舉進士累官至國子祭酒

李祥

字元德無錫人隆興初進士累遷國子祭酒時相趙如愚以言去國祥上疏爭之以罪去除湖

南運副言者劾罷之後以直龍圖閣致仕卒謚肅簡

李易

江都人高宗幸揚州御行殿策試賜易以下及第出身易好學多聞以清素自立仕至中書舍

人數文閣待制揚州有三

繼謂呂漆王昂與易也

李亘

字有夫兗州乾封人少好學有智慮以進士擢尚書郎建炎初金人犯淮南亘不及避劉豫使

守大名與凌唐佐謀密陳豫可取狀於朝事泄坐死後贈官立祠曰愍忠

李師中

字誠之楚邱人舉進士歷知濟兗二州有政績累官河東轉運使以言時政得失坐貶終

於南京奉祠師中落
落有奇節不容於時

李迨

參曾孫入太學以蔭補官累遷通判濟州高宗以大元帥過濟迨辦軍須無缺會勸進乘輿儀

物不日而辦建炎中除戶部侍郎金人歸三京以為京畿都轉運使或以金兵脅之迨曰吾世

食宋祿首可斷

膝不可屈也

李邴

字漢老濟州任城人崇寧中進士累官翰林學士辭命捷敏高宗時為兵部侍郎兼直學士時苗劉作亂邴面諭逆順禍福之理及責賊黨以大義後拜叅知政事嘗條上戰守策卒謚文敏

有草堂集

一百卷

李南公

字楚老鄭州人舉進士調浦江令歷知數郡以龍圖閣直學士致仕南公為吏六十年幹局明銳子諛第進士紹聖間知章邱縣後以直龍圖閣知熙州累遷陝西轉運使

李英

高要人為欽州推官死儂寇之難一家殲於虜刃者十有三人贈比部郎中廟食高要

李關

海陽人早喪父事母至孝通春秋餘經諸子皆知其大略隱居不仕以教授郡邑子弟貧者助其筆札尤精醫術鄉人賴之號北源先生有文集

李元方

石康人崇寧間上書論廣西便民一事稱旨累遷朝奉大夫知貴高二州有治行

李顯忠

永奇子年十七即隨父出入行陣及歸朝屢敗金兵授殿前都指揮使顯忠生長邊陲熟

悉敵情每用兵必先計而後戰時共稱為真關西將軍嘗為浙東副總管孝宗召除威武軍節度奇其狀貌魁傑命繪像閣下卒謚忠襄

李彥穎

字秀淑德清人少端重強記覽紹興間登第累官叅知政事論事激烈披露忠藎以觀文

殿學士致仕卒贈少保謚忠文

李公懋

建昌人建炎初進士累官江西提舉召對陳五事擢監察御史高宗駐蹕建康大臣請還

臨安公懋力排秦檜以為不可疏三上不報出為湖北提刑徙福建潼川剛正無私終湖南漕

李浩

建昌人早有文稱紹興中進士調曹州司戶累官直寶文閣知靜江府兼廣西安撫浩質直渾厚立朝忠憤激烈言切時弊人不敵干以私後徙居臨川

李長庚

寧遠人登紹興進士第歷仕五十年廉潔有守不事生業惟畜書數千卷號其讀書之室

曰冰壺卒年八十六有冰壺集

李燾

字仁甫丹陵人父中登第知仙井監燾紹興中進士博極羣書作續資治通鑑長編累官禮部

侍郎進敷文閣學士兼侍講同修國史燾以名節學術知名海內長編一書用力四十年始成

又有易學春秋學及文集總數百卷卒謚文簡累贈太師溫國公子厚著作郎至夔州路提點

刑獄

李稷

絢子以蔭歷官累遷陝西轉運使制置解鹽種

諤起兵寧夏議稷督餉築永樂城既成輦致金帛於其中夏人來圍城稷守之不敢去以及於難

李儔

臨邛人紹熙進士時光祖不豫久闕朝重華宮儔初釋褐即慨然上疏乞致仕有曰祿不逮養

乞將所得官資回贈二親冀以感動上意朝論偉之

李綱

字伯紀邵武人少有大志政和初舉進士仕徽欽高三朝官至宰相謚忠定綱負天下之望以

一身用捨為社稷生民安危雖用有不久而其忠誠義氣初不少貶嘗曰吾知盡事君之道不

可則全進退之節禍患不恤也所著有易傳內外論語詳說文章歌詩奏議諸集百餘卷

李郁

字光祖光澤人少從楊時學時妻以女紹興初嘗被召入對便殿既還家築室西山學者號曰

西山先生其卒也朱熹誌其墓
所著有易傳參同契論孟遺稿

李珙

永福人少以功名自奮會宜州蠻獠入寇攻禦
有功累官至武功大夫後金人犯關召天下兵
珙謂蔣炳文曰主憂臣辱主辱臣死豈可以道
遠便自營乎選州兵募死士凡三千人倍道兼
行至復州與敵將薛廣祝遇
力戰死之詔贈忠州防禦使

李政

為雲騎第六指揮在京東立戰功補官授河北
將官冀州駐劄金兵來攻城甚急有登城者政
呼曰事急矣有能躍火而過者有重賞於是
有十數人皆以濕氈裹身持杖躍火而過大呼力
戰金人驚駭有失杖者遂敗走政
大喜皆厚賞之未幾政死城遂陷

李安期

字泰伯建寧人淹貫經史援筆成文以詩名
岳飛死作表忠詩百二十首弔之一日謁四

川茶馬使王涯奇其才將以賢良舉偶因弄爭道安期推枰曰公平章天下亦可如此反覆乎遂拂衣而去竟不出王深自刻責以末藝失天下士有蒙谷詩集

李宋

字亮卿幼能自立刻苦向學弱冠登進士第兩任教官改秩高宗南渡近臣有以宋姓名聞於上者得旨賜對進劉首尾以自治為急上喜之即日除御史臺主簿遷監察御史挺挺敢言權倖側目累乞外補紹興九年出為廣南西路提點刑獄奉祠歸鄉

李寶

河北人嘗陷於金時淮浙姦民倪詢梁簡等教金人造舟且為鄉道寶拔身自海道來歸紹興三十年九月召對詢以北事歷歷如數乃以寶為浙西副總管令於平江督海舟捍禦明年十月金主亮寇淮分軍數萬圍海州寶與知州魏勝合擊大敗之遂與其子公佐引舟師至膠西

石臼島敵舟已出海口操舟者皆中原遺民遙見寶船給敵兵入舟中無復行次寶命火箭射之延火燒數百艘降其衆三千餘人斬其將完顏正嘉等六人獲其符印器甲糧斛以萬計時虞允文又大敗金人於采石金亮至瓜州為其下所殺

李富

字子誠唐游擊將軍尚旻之裔避武氏亂由南安州徙游洋後復遷于莆之洋尾富好施與嘗

於郡境內造橋梁凡三十有四所出南郭五里許建亭以憩行者凡二所建炎初尼瑪哈至富率義兵隸韓世忠麾下授承信郎宣使張淵聞富材略辟充殿前統制司幹官弗就辭歸養年七十八卒至今莆稱樂善之士必曰李制幹云

李復圭

知滑州司馬光賦詩餞之抵州嘗與郡官夜會宴有牙兵奪銀匠鐵鎚殺人者一府皆驚

復珪命捕至立斬之上章待罪諸司按其擅殺仁宗曰復珪帥材也除知慶州邵堯夫嘗稱其臨事有斷頗以

材見忌于時

李南壽

字元衡龍泉人高宗初年守道州疏減大體錢之甚病民者擢起居舍人一日直前論郡

守賢否因乞外補孝宗語之曰卿道州政事甚美如卿等姓名嘗書屏間未忍令卿去朕側尋改禮部侍郎

李復

字履中閬中人紹聖間為西邊使者猶及識橫渠先生博記能文有滴水集其間論孟子養氣

者動必由理故仰不愧於天俯不忤於地無憂無懼其氣豈不充乎故曰是集義所生者舍是則明有人非幽有鬼責自歎於中氣為之喪矣故曰無是餒也朱文公謂此語雖疎然却得其

大旨近世諸儒之論多以過而失之甚者
流於老莊而不知不若此說之為得也

李樗

字若林閩縣人與林之奇俱受業於呂本中後
領鄉貢有註毛詩解黃餘嘗稱之曰吾鄉之士

以文辭行義為學者宗師則若林其傑然者也
其學以孝弟忠信窮經博古為主及門之士亦
往往渾厚質實志尚修潔樗自
號迂齋學者因稱為迂齋先生

李宗儀

江夏人與從弟宗儒四世同居相友愛好學
獨行築書院建祠以祀先聖給田以贍來學

汴京失守程吏部千秋勤
王其子彥章開倉資給

李綺

字元質婺源人博學強記登紹興乙丑進士第
終福州教官年三十二嘗與盤洲伯仲共習詞

科南省校文考詞科得周益公必大朱晦菴熹
嘗謂元質有美才好學不壽又可見李氏之多

賢也

李宏

字彥恢宣城人宣和五年以左承直郎知旌德縣事時州郡多故調發旁午宏剗撥煩劇常有

餘力召集鄉兵部署精明人樂為用建炎初張遇寇江上進逼宣城境郡守呂好問檄令防禦遇知有備不敢犯呂復薦其有文武才可大用紹興初郡守李光復檄署旌德旌縣四載治官事如其家誅鋤豪猾興滯補弊營葺公宇規制皆可為後人法

李弇

字季純崇安人三領鄉舉登紹興八年進士第宰汀之連城俗以鬪狠相尚公政務寬平教以

孝友人不忍欺有伍氏兄弟爭繼連年不決公以理開諭皆感動而出時人為之謠曰訟者息爭居者安仁李公為政百里如春子岐

李道

安陽人初與兄旺聚衆歸宗澤澤因事誅旺命道掌其軍後依襄陽鎮撫使桑仲知隨州累遷

湖北副總管卒贈太尉謚忠毅以女為光宗后追封楚王

李安國

豫章人少穎悟能詩歷官知建昌軍剖決精明有兩邑賦不均請減其多者交頌頓息遷

知常州條上利害進司農卿開無名逋十八萬省楮幣百萬三年積緡錢斛米千百萬淳熙初

擢戶部侍郎

李大性

其先端州人祖積中為御史徙家豫章大性力學習典故仕至端明學士知平江府卒封

豫章郡公謚文惠弟大異中博學宏詞科官至諫議大夫大理第進士官至朝奉郎大東官至

龍圖閣學士大原官至朝散大夫其子孫尤盛

李琮

豐城人力學不倦趣向高雅邑有長隄江水為患琮輸財於官易以石以子貴進工部侍郎子

東登進士以都官郎中歷知宿州所至有惠政從子仲詢為金谿尉孫君伯知蕭縣元臨川丞登舉進士歷官吉水丞龍庚舉進士疏論五欺十賣之罪子丁卯為桂陽軍判官有文集

李如圭

吉水人七歲時孝宗召問童子何業對能誦書既誦無逸篇帝大喜授迪功郎明日與父

謝恩賜字殿上以父子不可同坐命設珠簾隔之宴罷就以簾賜之歸建凌雲樓以彰君賜後官至福建安撫使

李謬

南康人家貧好讀書舉進士通判吉州侗儻有材略所至冠賊平息

李揆

瀏陽人乾道二年領鄉薦授寧遠尉獲強盜十數或謂曰可用賞脫選揆曰殺人以階榮顯吾

不為也後累官

至中書舍人

李燾

字敬子建昌人紹熙初進士授岳州教授未上往建陽從朱熹學及至岳州教士以古今六藝改裏陽教授熹沒學禁嚴燾率同門徒會塾後以直秘閣主管至道宮卒謚文定孫鑣登進士

第

李舜臣

井研人八歲能屬文少長慨然有志於天下乾道初舉進士對策論金人世讎無可和之

義歷官至德興縣專尚風化官至宗正主簿舜臣學邃於易著本傳三十篇又有羣經義書小傳文集家塾編次論語若干

卷後以子貴追封崇國公

李繫

崇慶人第進士為隆州推官攝綿州振飢活十餘萬人又知永康提刑成都路兼提舉常平歲

凶活百七十萬人知興元府奏罷和羅之法梁
洋間繪像祀之遷太府少卿紫講學臨政皆有
源委所著有
桃溪集百卷

李侗

字愿中劔浦人從學羅從彥結茅山田謝絕世
故餘四十年飲食或不充而怡然自得沙縣鄧
迪嘗稱其如冰壺秋月瑩徹無瑕朱熹師事焉
世號延平先生卒謚文靖有延平問答及語錄
行世子友直信甫皆舉進士信甫仕至
監察御史以特立不容於朝出知衢州

李伯玉

餘干人嘉定間進士累官至禮部尚書抗直
敢言所居有峯曰萬斛故自號斛峯帝以伯

玉為舊學屢欲晉用時賈似道
柄國以直言忤其意遂黜於外

李嵩

錢塘人李從訓之養子工畫山水人物道釋得
從訓遺意尤長於界畫光寧理三朝畫院待詔

姪永年能

世其學

李岐

字稚山登乾道二年進士第調德安府應山尉攝邑事會歲飢公捐俸創利民倉以賑之興教

封川郡庠類弊即遷基鼎建又增置學田課勵諸生多所成就繼宰襄陽以已俸代五等戶輸納稅役民甚感之通判金州經總兩司財賦實隸焉先是軍餉支不以時公督趣勾辦按月請給殿帥田世卿郭果等分司駐劄于此交章上薦特差權州兼安撫除知南雄州陞辭之日郭帥在朝而奏其事王音獎諭曰卿在金州清廉有聲所宜推廣以副朕愛養元元之意公到郡首書忠廉公恕四字於州治之壁時貧民客戶以納丁米為苦公悉奏免之官至朝散大夫鹽淳熙直養為丞其縣甚著名績紹熙初攝

李直養

字無害廣陵人待制正己孫正己嘗寓家海

華亭部使者以才薦特改為海鹽令初莅縣遭大旱直養禱之得雨百姓歌頌修起學校延教諭朱沆為師嚴督章程誦絃相聞置鄉底堰八十餘所及長豐閘又自藍田廟開浦十八里至鮑郎場以便鹽運民被其利

李信甫

南劍人侗之子舉進士歷監察御史出知衢州善政善教不忝家學推廣東江東憲以特

立不容於朝罷去

李相祖

字時可閩祖之弟在朱門辯質詳明用心精切嘗以熹命編書說三十餘卷弟壯祖字處

謙與閩祖同登第調閩清尉熹亦嘉其有志真德秀常以典刑人物薦之

李琬

字粹之建寧人學行為鄉閭所推重同邑謝皓謝黻皆受業其門業祖洽暨鄉人列於朝者以

八行薦未受而卒

有詩集行於世

李純德

字德之誥之孫光澤人少治周禮兼左氏春秋為文簡古不逐時好諸弟嘗問善人之道

答曰臨事而無陰據便利之心斯可矣邑嘗以民兵屬純德為制戰陣擊刺之法以時閱習甚有可觀今欲以聞奇其勲純德笑謝人益高之紹興五年以特奏恩將入奉廷對先卒朱子銘其墓以好德有常之士稱之

李學遜

元綱九世孫博學洽聞善天文尤邃於易為文典雅人有得其片言隻字者寶而藏之所

著有易精中星儀像等圖

李元白

名齊以字行寧化人博覽強記不能俛就舉子業乃大肆力於詩出入少陵集中幾遍真

記纂杜詩為押韻又集其句為一編皆行於世嘗集大觀昇平詞若干首以進得初品官即歸故廬笑傲泉石而終老焉集句始於王安石而孔毅甫葛亞卿相繼而作俱聲聞於時

李夔

字師和邵武人經書一覽成誦文不停綴舅黃履器之與楊時友善登元豐二年進士第嘗為

華亭縣尉有政聲遷縣令累官右文殿修撰終龍圖閣待制以子綱恩贈太師衛國公

李復圭

字審言徐州豐人歷湖北兩浙淮南河東陝西成都六轉運使浙民以給衙前役多破產

復圭悉罷遣歸農令出錢助長召人承募民便之瀕海人賴蛤沙地以生豪家量受稅於官而占為己有復圭奏蠲其稅分以予民

李仲光

字景溫崇安人也登開禧元年進士甲科趙汝騰一見稱為奇才光每以才高見忌仕途

多顛自雷陽分教歸養晦十餘年自號肯堂放情山水寓意花木主盟書社少精老莊韓柳之文善記序有古體晚年詩筆愈高古時相勉其出調湖南幕屬而卒有肯堂集

李韶

彌遜曾孫父文饒為台州司理多陰德嘉定中韶與兄寧同舉進士累官起居舍人上封事數

千言出知漳州累遷翰林學士後以端明殿學士奉祠韶忠厚簡澹門無雜賓云

李日邁

字伯行湖口人嘉定知上高罷度數遠凡天文地理陰陽醫卜書悉探奧雖政尚寬大

而吏不能欺留意學校篤愛小民嘗患邑困茶課後為監察御史奏除其額

李用

東莞人少孤事母孝棄舉業究周程之學著論語解以薦授校書郎不就咸淳間祠於學

李宗勉

字彊父富陽人開禧初進士嘉熙中累遷至左丞相兼樞密使守法度抑僥倖不私親黨

尤樂聞讜言身居台輔家
若貧儒卒贈少師謚文清

李洞

字虛中麗水人初為太學生有名耿介寡合舉進士當官不肯附麗居鄉未嘗請托官至秦州

通判賊陷郡父沒於寇洞隨官
軍收復得殺其父者手刃之

李誼

南昌人幼以孝聞舉進士罷入太學歷官諫議大夫奏牘數百無不剴切當帝心嘗論講和之

非秦檜不樂累遷工部尚書資
政殿學士所著有文集三十卷

李性傳

舜臣子嘉定中進士累官起居舍人兼侍講上疏論喪禮嘗進讀仁皇訓典乞讀帝學從

之淳祐中拜端明殿學士叅知政事尋同知
樞密院事後以觀文殿學士致仕卒贈少保

李道傳

性傳弟讀程氏書玩索義理至忘寢食推慶
元初進士累官著作郎歷知果州致仕卒謚

文節道傳篤於踐履氣節卓然於經史未有論著曰學未至不敢於詩文未嘗苟作曰學未至不暇居官以惠利為本江東人久而思焉

李心傳

道傳弟慶元初開戶著書以薦賜進士為史館校勘修中興四朝帝紀後遷著作郎詔重

修十三朝會要書成遷工部侍郎未幾致仕心傳有史才所著有高宗繫年錄學易編誦詩訓春秋考禮辯讀史考及詩文共數百卷

李壁

熹第三子日誦萬餘言舉進士為正字寧宗時累官參知政事兼同知樞密院後謫撫州又起

知遂寧府以資政殿學士致仕卒謚文懿壁文學德望轟震一時所著有雁湖集消塵紹興中奏議內外制臨汝閒書共數百卷

李璽

素第四子舉進士入為館職文聲赫然班對備陳忠謹為沿江制置副使開閫於鄂甚得江漢

之心入為禮部尚書資政殿學士卒謚文肅所著有悅齋集

李喜

建炎中知彭陽縣與民移治境上兵執之以獻金人欲官之固拒不受後死於原州

李方子

字公誨光澤人朱熹高第端謹純篤天資近道自號果齋嘉定中進士第三累官國子錄

通判辰州所著有禹貢解傳道精語等書弟文子紹熙中進士亦以道學倡門人宗仰之

李閱祖

字守約光澤人父呂號澹軒與朱熹為友三子從事閱祖篤志精思熹留之家塾為編中

庸或問輯畧登嘉定進士為臨桂簿仲弟相祖用心精切編書說三十餘卷季弟壯祖舉進士為閩清尉真德秀薦之稱其為人物典刑

李東

字子賢，網族。孫受學於朱熹，登紹熙進士，為廬陵簿。秩滿，周必大餞以詩，地跨江閩，秀氣薰玉。

成界尺，直方廉。西曹久處習鑿齒高士，惟知孫子巖。

李餘慶

字昌宗，連江人。判秀州境，多鹽盜，餘慶作華亭海鹽二監，俾業鹽者歲入常緡，以杜私販。

又為石隄，自平望至吳江，捍除水患，至今賴之。

李奇

字子正，宜春人。景祐元年登第，嘉祐中任職方員外郎。性慷慨，不事產業，悉以祖產分兄弟。仍戒子孫不得追取，既卒，族人端以詩哭之。有祖來產業，分兄弟身後，詩書遺子孫之句。

李大訓

字君序，閩縣人。父士龍，仕至奉直大夫，直秘閣。以老居里中，後生考德問業者，士龍應之。無倦色。大訓初為廬陵丞，歷知安遠、龍泉二縣，在倥傯中力於事功，再知歸善縣，則以安靜修。

禮教為務所至稱廉勤整辦論者謂其儒而不腐吏而不俗云

李師愈

字好古高安人博學多聞從劉子澄講學廬山朱文公高第李楚嘗訪師愈有詩稱之乾

道間領鄉薦漕使為煜舉應制科未召而卒

李充

字仲實弱冠入上庠元祐中擢進士除真州司戶秩滿改宣德郎知臨海縣盜起青溪二浙州

郡相繼失守太守棄城遁去獨與通判李景淵戮力守禦寇至獲全部使者以聞詔書獎諭陟奉議郎宣和末山東盜賊猖獗遠近繹騷州縣疲於奔命乃投匭歎曰張季鷹烏發歸興於蓴鱸陶淵明恥折腰於五斗吾慕前人固已晚矣遂以微文引去及虜騎長驅衣冠淪陷而獨從容獲免識者韙之

李義山

嘉魚人讀書一過能解大義師事朱仲晦張敬夫嘉定中進士淳祐中任樞密院編修累

官金部郎中稱其行美如瑜節介如石後賜爵中大夫

李如雷

臨武人別號月溪逸士生於理宗朝少與奎龍友善時衡陽郡建石鼓書院欲得士有司

以如雷奎龍往宋祚移遂隱居力學平生所為詩文甚富獨恥學舉子業嘗曰予亦宋之遺老也雖未委質而忍事異姓乎凡所作直紀歲不題元號每愛月溪山水之奇結廬於上因以自號云

李譽

字適道與黃植同榜進士官至廣西靈川縣令時多峒苗舉至以德化之三年民皆謝刀劍務

農桑事當道勞之曰此古之龔黃也靈川至今賴焉

李惟幾

字幾道河內人嘉祐間知海鹽歲薦饑數上書請官錢貸民濬溝洫樹木開置鄉底堰民

獲歲稔後乾道中李大卞為令修堰閘之利民亦稱之

李丑父

字良翁先名綱字汝礪德昭從曾孫父宗之通判邵武軍以文名諸史百家口答疑問人

以書厨目之丑父幼穎悟讀書迎刃而解出語輒驚人劉克莊王邁方大琮見大奇之端平二年擢第調邵武司戶叅軍歷浙西節制司準遣鄭清之當國除刑工架閣充省試檢點官遷太學正沂王府教授以臺疏薦添差淮浙發運司幹官賈似道時制置兩浙薦之添差通判福州除太學博士遷諸王宮教授丁大全當軸丑父忤其意遂罷予祠復遷著作郎權禮部郎中丑父篤實清脩溫良和易胷次洒然與人無新故一語必用情所得祿賜僅自給而銖積其餘為

義廉與弟姪其詩文溫潤清新有集藏於家

李曾伯

潭懷人後居嘉興歷官寶章閣直學士進擢兵部尚書累以直言受賞曾伯初與賈似道

俱為閫帥邊境之事知無不言似道嫉之卒使不竟其用云

李誠之

字茂卿東陽人受學呂祖謙鄉貢太學皆第一知蘄州嘉定間虜人犯蘄黃誠之堅守城

壁罵賊而死詔憫其忠贈正節侯立祠郡庠真德秀表其墓

李大同

字從中東陽人嘉定間進士歷官右正言陳格天心弭災變進兵攻討之說累官至工部

尚書寶謨

閣學士

李昌國

江夏人善於教子三子長康侯任至河陽守次康年仕至監丞善古篆與蘇軾黃庭堅游

次康直仕至左司員外郎休官歸里自稱裕老

李庭芝

字祥甫隨州應山人少穎悟日誦數千言淳祐初舉進士第知濠州後主營兩淮制置司

事大興鹽利揚民德之如父母尋生累罷元兵圍揚州復起制置兩淮遣兵首應勤王詔城守揚州日出兵死鬪加叅知政事宋亡不屈阿朮殺之揚州民皆慟哭

李大臨

華陽人嘉祐中進士累官秘閣校理倣居陋巷仁宗遣使賜御書使者見大臨親秣馬還

奏帝曰李大臨真蘆士也大臨清整有守論議識大體神宗時知制誥言青苗之害疏李定之過時論偉之

李傳

通川人元豐間舉進士欽宗居東宮時傳與耿南仲俱侍講及即位賜水晶斧以旌其賢後知

漢州

李鳴復

瀘州人嘉定初進士歷官大理少卿侍御史兼侍講進對言荆襄制臣有當戒者三曰去

私禁暴懲怒後累遷兼樞密院
兼參知政事加資政殿大學士

李昂英

番禺人寶慶初舉進士累官右正言時趙與憲知臨安府固利奉上昂英劾其聚斂害民

理宗難之至牽裾力諫又劾中官董宋臣與之俱罷仕終吏部侍郎謚忠簡

李渤

樂昌人嘉祐初進士世業儒郡人尊之稱為夫子嘗試南昌作伯夷風賦中魁時有詩云嶺北

嘗聞夫子號江西曾振伯夷風第巖以上
書召見賜同進士後渤知白州巖知象州

李積中

四會人父士庶有陰德積中登甲科官至御史翰林直學士以直言入元祐黨籍始寓居

豫章李氏自積中三世官於朝而父子兄弟相師友于大性少力學尤習當時典故累官兵部尚書後以端明殿學士知平江府卒謚文惠大性與弟大異大東竝躋從列為名臣云

李時亮

博白人嘉祐中舉進士累官知廬州有政聲嘗獻平邊十策及疏時政得失神宗嘉之累

遷檢校散騎常侍兼御史大夫時亮善屬文尤長於詩與陶弼賡和號李陶集

李芾

字叔章衡人生而聰警少自誓立名其齋曰無暴棄初補南安司戶歷知永溫州有惠政咸淳

初入知臨安府忤賈似道罷去起知潭州兼安撫使元兵至芾極力戰守城破芾命帳下沈盡忠殺其家人而後殺已忠如其言事聞謚忠節

李成大

建昌人舉進士德祐初知金壇縣元兵至與戰不勝吏民協成大降乃潛與胡用存謀復

金壇事泄繫獄榜掠不屈遂殺其二子以懼之
終不屈笑曰子為父死臣為君死亦殺之詔贈

直秘閣

諡忠節

李梓

發上猶人元至元中托爾楚元帥次猶梓發等
不肯降托爾楚元帥圍城七旬弗克退師已

卯賈叅政復至不降邑士黃桂發才英逆知屠
城忘命入城擬殺父母中道獲於賈叅政以實
告之叅政曰汝可將省榜入城招降不惟汝父
母可安合城俱安桂發等入城為李所殺卒至
屠城梓發率民巷戰勢窮力屈回家以酒肉酌
別老幼令健卒自殺由幼而老四十七口梓發
與子舉火自焚而死事詳

文山先生督府忠義傳

李謙

字和卿朴從孫父珙行義修潔經典該通賜號
養素處士謙咸淳間舉進士為安福縣尉獲盜

不願受賞後為浙東提舉值歲飢
賑濟活人甚多官至左司郎中

萬姓統譜卷七十二